



攝大乘論

陳天竺三藏真諦譯  
元魏天竺沙門佛陀扇多譯



清刻龍藏佛說法變相圖

攝大乘論序

陳沙門慧愷撰

隱六

夫至道弘曠無思不洽大悲平等誘進靡窮  
 德被含生理非偏漏但迷塗易久淪惑難息  
 若先談出世則疑性莫啓故設教立方各隨  
 性欲唐虞之前圖諜簡少姬周已後經誥弘  
 多雖復製禮作訓並導之以俗法而真假妙  
 趣尚冥然未覩故迹隱葱嶺以西教祕滄海  
 之外自漢室受命方稍東漸爰及晉朝斯風  
 乃盛梁有天下彌具興隆歷千祀其將半涉  
 七代而迄今法蘭導清源於前童壽振芳塵  
 於後安睿騁壯思以發義端生肇擅玄言以  
 釋幽致雖並策分鑣同瀾比派而深淺競馳  
 昭晦相雜自茲以降篤好逾廣莫不異軌同  
 奔傳相祖習而去取隨情開抑殊軫慧愷志

慚負橐勤愧聚螢謬得齒迹學徒稟承訓義  
遊寓講肆多歷年所名師勝友備得諮詢但  
綜涉踈淺鑽仰無術尋波討源多所未悟此  
蓋慮窮於文字思迷於弘旨明發興嗟負心  
非一每欲順風問道而未知厥路有三藏法  
師是優禪尼國婆羅門種姓頗羅墮名拘羅  
那他此土翻譯稱曰親依識鑿淵曠風表俊  
越天才高桀神辯閑縱道氣逸群德音邁俗  
少遊諸國歷事衆師先習外典洽通書奧苞  
四韋於懷抱吞六論於曾衿學窮三藏貫練  
五部研究大乘備盡深極法師既博綜墳籍  
妙達幽微每欲振立宗於他域啓法門於未  
悟以身許道無憚遠遊跨萬里猶比隣越四  
海如咫尺以梁太清二年方屆建業仍值梁  
季混淆橫流荐及法師因此避地東西遂使

大法擁而不暢未至九江及遊五嶺凡所翻  
譯卷軸未多後適聞越敷說不少法師每懷  
慷慨所歎知音者希故伯牙絕絃卞和泣璧  
良由妙旨之典難辯盈尺之珍罕別法師遊  
方既久欲旋返舊國經塗所亘遂達番禺儀  
同三司廣州刺史陽山郡公歐陽顥表岳  
靈德洞河府經文緯武匡道佐時康流民於  
百越建正法於五嶺欽法師之髙行慕大士  
之勝規奉請爲菩薩戒師恭承盡弟子禮愷  
昔嘗受業已少滌沉蔽服膺未久便致睽違  
今重奉值倍懷蹈舞復欲食和稟德訪道陳  
疑雖慙慙三請而不蒙允遂恍然失圖心魂  
靡託衡州刺史陽山公世子歐陽紇風業峻  
整威武貞拔該閱文史深達治要崇瀾內湛  
清輝外溢飲賢味道篤信愛奇躬爲請主兼

申禮事法師乃欣然受請許為翻譯制旨寺  
主慧智法師戒行清白道氣宏壯志業闊瞻  
觸途必舉匡濟不窮輪奐靡息征南長史袁  
敬德履沖明志託夷遠微猷清簡冰桂齊質  
弼諧蕃正民譽早聞兼深重佛法崇情至理  
黑白二賢為經始檀越辰次昭陽歲維協洽  
月呂姑洗神紀句芒於廣州制旨寺便就翻  
譯法師既妙解聲論善識方言詞有以而必  
彰義無微而不暢席間函丈終朝靡息愷謹  
筆受隨出隨書一章一句備盡研竅釋義若  
竟方乃著文然翻譯之事殊難不可存於華  
綺若一字參差則理趣胡越乃可令質而得  
義不可使文而失旨故今所翻文質相半與  
僧忍等同共稟學夙夜匪懈無棄寸陰即以  
其年樹檀之月文義俱竟本論三卷釋論十

二卷義疏八卷合二十三卷此論乃是大乘  
之宗極正法之秘奧妙義雲興清詞海溢深  
固幽遠二乘由此迷墜曠壯該舍十地之所  
宗學如來滅後將千一百餘年彌勒菩薩投  
適時機降靈俯接忘已屈應為阿僧伽法師  
廣釋大乘中義阿僧伽者此言無著法師得  
一會道體二居宗該玄鑒極凝神物表欲敷  
闡至理故製造斯論唯識微言因茲得顯三  
性妙趣由此而彰冠冕彛倫舟航有識本論  
即無著法師之所造也法師次第婆藪槃豆  
此曰天親道亞生知德備藏往風格峻峙神  
氣爽發稟厥兄之雅訓習大乘之弘旨無著  
法師所造諸論詞致淵玄理趣難曉將恐後  
生復成紕紊故製釋論以解本文籠小乘於  
形內挫外道於筆端自斯已後迄于像季方

等圓教乃盛宣通慧愷不揆虛薄情慮庸淺  
乃欲泛芥舟於巨壑策駟足於長路庶累毫  
成仞聚爝爲明有識君子幸宜尋閱其道必  
然無失墜也

攝大乘論卷上

陳天竺三藏真諦譯

依止勝相品第一中初衆名品

攝大乘論即是阿毗達磨教及大乘脩多羅佛世尊前善入大乘句義菩薩摩訶薩欲顯大乘有勝功德依大乘教說如是言諸佛世尊有十勝相所說無等過於餘教十勝相者一應知依止勝相二應知勝相三應知入勝相四入因果勝相五入因果修差別勝相六於修差別依戒學勝相七此中依心學勝相八此中依慧學勝相九學果寂滅勝相十智差別勝相由此十義勝相如來所說過於餘教如此釋脩多羅文句顯於大乘真是佛說復次云何此中略釋能顯大乘勝於餘教今此略釋顯斯十義唯大乘有小乘中無何者

爲十謂阿黎耶識說名應知依止相三種自性一依他性二分別性三真實性說名應知相唯識教說名應知入相六波羅蜜說名入因果相菩薩十地說名入因果修差別相菩薩所受持守護禁戒說名於修差別戒學相首楞伽摩虛空器等定說名心學相無分別智說名慧學相無住處涅槃說名學果寂滅相三種佛身自性身應身化身此三說名無分別智果相如此十種處唯大乘中有異於小乘故說第一佛世尊但爲菩薩說此十義故依大乘諸佛世尊有十勝相所說無等過於餘教復次云何此十勝相所說無等能顯大乘是如來正說遮小乘決非大乘於小乘中未曾見此十義隨釋一義但見大乘中釋復次此十義能引出無上菩提成就隨順不

相違為諸眾生得一切智而說偈言

應知依及相 入因果修異 三學及果滅

智無上乘攝 十義餘處無 見此菩提因

故大乘佛言 由說十義勝

云何十義如此次第說菩薩初學應先觀諸

法如實因緣由此觀故於十二緣生應生聰

慧次後於緣生法應了別其體相由智能離

增益損減二邊過失如此正修應通達所緣

如實諸相次後從諸障應解脫次心心已通

達應知實相是先行六波羅蜜應更成就令

清淨無復退失由依意內清淨故次內清淨

所攝諸波羅蜜依十地差別應修隨一三阿

僧祇劫次菩薩三學應令圓滿圓滿已是學

果涅槃及無上菩提次後應得修十義次第

如此此次第說中一切大乘皆得圓滿此初

說應知依止立名阿黎耶識世尊於何處說

此識及說此識名阿黎耶如佛世尊阿毗達

磨略本偈中說

此界無始時 一切法依止 若有諸道有

及有得涅槃

阿毗達磨中復說偈言

諸法依藏住 一切種子識 故名阿黎耶

我為勝人說

此阿舍兩偈證識體及名云何佛說此識名

阿黎耶一切有生不淨品法於中隱藏為果

故此識於諸法中隱藏為因故復次諸眾生

藏此識中由取我相故名阿黎耶識阿舍云

如解節經所說偈

執持識深細 法種子恒流 於凡我不說

彼物執為我

云何此識或說為阿陀那識能執持一切有  
 色諸根一切受生取依止故何以故有色諸  
 根此識所執不壞不失乃至相續後際又正  
 受生時由能生取陰故故六道身皆如是取  
 是取事用識所執持故說名阿陀那或說名  
 心如佛世尊言心意識意有二種一能與彼  
 生次第緣依故先滅識為意又以識生依止  
 為意二有染汙意與四煩惱恒相應一身見  
 二我慢三我愛四無明此識是餘煩惱識依  
 止此煩惱識由一依止生由第二染汙由緣  
 塵及次第能分別故此二名意云何得知有  
 染汙心若無此心獨行無明則不可說有與  
 五識相似此法應無何以故此五識共一時  
 有自依止謂眼等諸根復次意名應無有義  
 復次無想定滅心定應無有異何以故無想

定有染汙心所顯滅心定不爾若不爾此二  
 定應不異復次於無想天一期應成無流無  
 失無染汙故於中若無我見及我慢等復次  
 一切時中起我執遍善惡無記心中若不如  
 此但惡心與我執等相應故我及我所此或  
 得行於善無記中則不得行若立二心同時  
 生無此過失若立與第六識相應行有此過  
 失

無獨行無明	及相似五識	二定無差別
意名無有義	無想無我執	一期生無流
善惡無記中	我執不應起	離汙心不有
二與三相違	無此一切處	我執不得生
證見真實義	惑障令不起	恒行一切處
名獨行無明		

此心染汙故無記性攝恒與四惑相應譬如

色無色界或是有覆無記此二界煩惱奢摩他所藏故此心恒生不廢尋第三體離阿黎耶識不可得是故阿黎耶識成就為意依此以為種子餘識得生云何此意復說為心多種熏習種子所聚故云何於聲聞乘不說此心相及說阿黎耶阿陀那名微細境界所攝故何以故聲聞人無有勝位為得一切智智是故於聲聞人離此說由成就智令本願圓滿故不為說諸菩薩應有勝位為得一切智故佛為說何以故若離此智得無上菩提無有是處復次此識於聲聞乘由別名如來曾顯如增一阿含經言於世間喜樂阿黎耶愛阿黎耶習阿黎耶著阿黎耶為滅阿黎耶如來說正法世間樂聽故屬耳作意欲知生起正勤方得滅盡阿黎耶乃至受行如來正法

及似法由如來出世是第一希有不可思議隱六法於世間顯現如本識此如來出世四種功德經由別義於聲聞乘此識已顯現復次摩訶僧祇部阿舍中由根本識別名此識顯現譬如樹依根彌沙塞部亦以別名說此識謂窮生死陰何以故或色及心有時見相續斷此心中彼種子無有斷絕是應知依止阿陀那阿黎耶質多根本識窮生死陰等由此名小乘中是阿黎耶識已成三路復有餘師執心意識此三但名異義同是義不然意及識已見義異當知心義亦應有異復有餘師執是如來說世間喜樂阿黎耶如前所說此中有五取陰說名阿黎耶復有餘師執樂受與欲相應說名阿黎耶復有餘師執身見說名阿黎耶如此等諸師迷阿黎耶由阿舍及修

得是故作如是執由隨小乘教及行是師所立義不中道理若有人不迷阿黎耶識約小乘名成立此識其義最勝云何最勝若執取陰名阿黎耶於惡趣隨一道中一向若受處於彼受生此取陰最可惡逆是取陰中一向非可愛衆生喜樂不應道理何以故彼中衆生恒願取陰斷絕不生若可是樂受與欲相應從第四定乃至上界皆無此受若人已得此受由求得上界則生厭惡是故衆生於中喜樂不稱道理若是身見正法內人信樂無我非其所愛於中不生喜樂此阿黎耶識衆生心執爲自內我若生一向若受道中其願若陰永滅不起阿黎耶識我愛所縛故不曾願樂滅除自我從第四定以上受生衆生雖復不樂有欲樂受於阿黎耶識中是自我愛

隨逐不離復次正法內人雖復願樂無我違逆身見於阿黎耶識中亦有自我愛以阿黎耶名安立此識則爲最勝是名成立阿黎耶別名  
依止勝相品中二相品  
復次成立此識相云何可見此相略說有三種一立自相二立因相三立果相立自相者依一切不淨品法習氣爲彼得生攝持種子作器是名自相立因相者此一切種子識爲生不淨品法恒起爲因是名因相立果相者此識因種種不淨品法無始習氣方乃得生是名果相何法名習氣此習氣名欲顯何義此法與彼相應共生共滅後變爲彼生因此即所顯之義譬如於麻以華熏習麻與華同時生滅彼數數生爲麻香生因若人有欲等

行有欲等習氣是心與欲等同生同滅彼數  
數生為心變異生因若多聞人有多聞習氣  
數思所聞共心生滅彼數數生為心明了生  
因由此熏習得堅住故說此人為能持法於  
阿黎耶識應知如此道理此染汙種子與阿  
黎耶識同異云何不由別物體故異如此和  
合雖難分別而非不異阿黎耶識如此而生  
熏習生時有功能勝異說名一切種子

云何阿黎耶識與染汙一時更互為因譬如  
燈光與燈炷生及燒然一時更互為因又如  
蘆束一時相依持故得住立應知本識與能  
熏習更互為因其義亦爾如識為染汙法因  
染汙法為識因何以故離此二法異因不可  
得故

云何熏習不異不多種而能為有異多種諸

法作生因譬如多縷結衣衣無多色若入染  
器後於衣上種種相貌方得顯現如此阿黎  
耶識種種諸法所熏熏時一性無有多種若  
生果染器現前則有不可數種類相貌於阿  
黎耶識顯現此緣生於大乘最微細甚深若  
略說有二種緣生一分別自性二分別愛非  
愛依止阿黎耶識諸法生起是名分別自性  
緣生由分別種種法因緣自性故復有十二  
分緣生是名分別愛非愛於善惡道分別愛  
非愛生種種異因故若人於阿黎耶識迷第  
一緣生或執自性是生死因或執宿作或執  
自在變化或執八自在我或執無因若迷第  
二緣生執我作者受者譬如衆多生盲人  
不曾見象有人示之令彼觸證有諸盲人或觸  
其鼻或觸其牙或觸其耳或觸其脚或觸其

尾或觸其脊等有人問之象為何相盲人答云象如犁柄或說如杵或說如箕或說如日或說如篲或說如山石若人不了二種緣生無明生盲或說自性為因或說宿作或說自在變化或說八自在我或說無因或說作者受者由不了阿黎耶識體相及因果相如彼生盲不識象體相作種種異說若略說阿黎耶識體相是果報識是一切種子由此識攝一切三界身一切六道四生皆盡為顯此義故說偈言

外內不明了 於二但假名 及真實一切  
 種子有六種 念念滅俱有 隨逐至治際  
 決定觀因緣 如引顯自果 堅無記可熏  
 與能熏相應 若異不可熏 說是熏體相  
 六識無相應 三差別相違 二念不俱有

餘生例應爾 此外內種子 能生及引因  
 枯喪猶相續 然後方滅盡 譬如外種子  
 內種子不爾  
 此義以二偈顯之

於外無熏習 種子內不然 聞等無熏習  
 果生非道理 已作及未作 失得并相違  
 由內外得成 是故內有熏

所能餘識異阿黎耶識謂生起識一切生處  
 及道應知是名受用識如中邊論偈說  
 一識名緣說 二說名受識 了受名分別  
 起行等心法 陸六 十二

此二識更互為用如大乘阿毗達磨說  
 諸法於識藏 識於法亦爾 此二互為因  
 亦恒互為果  
 若於第一緣生中諸法與識更互為因緣於

第二緣生中諸法是何緣是增上緣復次幾緣能生六識有三緣謂增上緣緣緣次第緣如此三緣生一窮生死緣生二愛憎道緣生三受用緣生具足四緣依止勝相品中三引證品

此阿黎耶識已成立由衆名及體相云何得知阿黎耶識以如是等衆名故如來說體相亦爾不說生起識若離此名相所立阿黎耶識不淨品等皆不成就煩惱不淨品業不淨品生不淨品世間淨品出世淨品等皆不成就云何煩惱不淨品不成就根本煩惱及少分煩惱所作熏習種子於六識不得成就何以故眼識與欲等大小二惑俱起俱滅此眼識是惑所熏成立種子餘識不爾是眼識已滅或餘識間起熏習及熏習依止皆不可得

勝六

十三

眼識前時已謝現無有體或餘識所間從已滅無法有欲俱生不得成就譬如從過去已滅盡業果報不得生復次眼識與欲等或俱時生起熏習不成何以故此種子不得住於欲中以欲依止識故又欲相續不堅住故此欲於餘識亦無熏習依止別異故所餘諸識無俱起俱滅故同類與類不得相熏以無一時共生滅故是故眼識不爲欲等大小諸惑所熏亦不爲同類識所熏如此思量眼識所餘諸識亦應如此思量復次若衆生從無想天以上退墮受下界生大小惑所染初識此識生時應無種子何以故此惑熏習與依止並已過去滅無餘故復次惑對治識已生所餘世間諸識皆已滅盡若無阿黎耶識此對治識共大小惑種子俱在此義不成何以故

自性解脫故無流心與惑不得俱起俱滅故  
復次後時出觀正起世間心諸惑熏習久已  
謝滅有流意識無有種子生應得成是故離  
阿黎耶識煩惱染汙則不得成復次業染汙  
云何不得成緣行生識分無得成義若無此  
義緣取生有亦無成義故業染汙不成復次  
云何生染汙此義不成結生不成故若人於  
不靜地退墮心正在中陰起染汙意識方得  
受生此有染汙識於中陰中滅是識託柯羅  
邏於母胎中變合受生若但意識變成柯羅  
邏等依止此意識於母胎中有別意識起無  
如此義於母胎中二種意識一時俱起無此  
義故已變異意識不可成立為意識依止不  
清淨故長時緣境故所緣境不可知故若此  
意識已變異是時意識成柯羅邏為此識是

一切法種子為依止此識生餘識為一切法  
種子若汝執已變異識名一切種子識即是  
阿黎耶識汝自以別名成立謂為意識若汝  
執能依止識是一切種子識是故此識由依  
止成他因此所依止識若非一切種子識能  
依止名一切種子識是義不成是故此識託  
生變異成柯羅邏非是意識但是果報亦是  
一切種子此義得成復次若眾生已託生不  
能執持所餘色根離果報識則不可得何以  
故所餘諸識定別有依止不久堅住若此色  
根無執持識亦不得成復次此識及各色更  
互相依譬如蘆束相依俱起此識不成復次  
若離果報識一切求生已生眾生識食不成  
何以故若離果報識眼識等中隨有一識於  
三界中受生眾生為作食事不見有能故若

隱六

十四

人從此生捨命生上靜地由散動染汙意識於彼受生是染汙散動識於靜地中離果報識有餘種子此義不成復次若眾生無色界離一切種子果報識若生染汙心及善心則無種子并依止染汙及善二識皆不得成於無色界若起無流心所餘世間心已滅盡隱六便應棄於此道若眾生非想非非想中起不用處心及無流心即捨二處何以故無流心是出世心故非想非非想道非其依止不用處道亦非依止直趣涅槃亦非依止復次若人已作善業及以惡業正捨壽命離阿黎耶識或上或下次第依止冷觸不應得成是故生染汙離一切種子果報識不可得立云何世間淨品不成若眾生未離欲界未得色界心先起欲界善心求離欲界脩行觀

心此欲界加行心與色界心不俱起俱滅故非所熏是故欲界善心非是色界善心種子過去色界心無量餘生及別心所隔後時不可立為靜識種子已無有故是故此義得成謂色界靜心一切種子果報識次第傳來立為因緣此加行善心立為增上緣如此於一切離欲地中是義應知如此世間清淨品義離一切種子果報識則不可立云何出世淨品離阿黎耶識不可得立佛世尊說從聞他音及自正思惟由此二因正見得生此聞他音及正思惟不能熏耳識及意識或耳意二識何以故若人如聞而解及正思惟法爾時耳識不得生意識亦不得生以餘散動分別識所聞故若與正思惟相應生此意識久已謝滅聞所熏共熏習已無云何後時以前識

為種子後識得生復次世間心與正思惟相應出世淨心與正見相應無時得共生共滅是故此世心非關淨心所熏既無熏習不應得成出世種子是故若離一切種子果報識出世淨心亦不得成何以故此中聞思熏習無有義能攝出世熏習種子云何一切種子果報識成不淨品因若能作染濁對治出世淨心因此出世心昔來未曾生習是故定無熏習若無熏習此出世心從何因生汝今應答最清淨法界所流正聞熏習為種子故出世心得生此聞慧熏習為與阿黎耶識同性為不同性若是阿黎耶識性云何能成此識對治種子若不同性此聞慧種子以何法為依止至諸佛無上菩提位是聞慧熏習生隨在一依止處此中共果報識俱生譬如水乳

此聞熏習即非本識已成此識對治種子故此中依下品熏習中品熏習生依中品熏習上品熏習生何以故數加行聞思修故是聞熏習若下中上品應知是法身種子由對治阿黎耶識生是故不入阿黎耶性攝出世最清淨法界流出故雖復世間法成出世心何以故種子出世淨心未起時一切上心或對治一切惡道生對治一切惡行朽壞對治能引相續令生是處隨順逢事諸佛菩薩此聞熏習雖是世間法初修觀菩薩所得應知此法屬法身攝應六若聲聞獨覺所得屬解脫身攝十七此聞熏習非阿黎耶識屬法身及解脫身攝如是如是從下中上次次第漸增如是如是果報識次第漸減依止即轉若依止一向轉是有種子果報識即無種子一切皆盡若本識

與非本識共起共滅猶如水乳和合云何本識滅非本識不滅譬如於水鵝所飲乳猶如世間離欲時不靜地熏習滅靜地熏習增世間轉依義得成出世轉依亦爾若人入滅心定由說識不離身是故果報識於定中應成不離身何以故滅心定非識對治故云何知然若從此定出識不應更生何以故此果報識相續已斷若離託生時不復得生若人說滅心定有心此人所說則不成心何以故定義不成故解相及境不可得故與善根相應過故與惡及無記不相應故想及受生起過故於三和合必有觸故於餘定有功能故但滅想是過患故作意信等善根生起過故拔除能依離所依不可得故有譬喻故如非一切行一切行不如是故若有人執色心次第

生是諸法種子此執不然何以故已有前過復有別失別失者若人從無想天退及出滅心定此中所執不成阿羅漢最後心亦不得成若離次第緣此執不成如此若離一切種子果報識淨不淨品皆不得成是故此心有義成就應當信知依前所說相今更作偈  
菩薩於善識 則離餘五識 無餘心轉依  
以何方便作 若對治轉依 非滅故不成  
因果無差別 於滅則有過 無種子無法  
若許為轉依 於無二無故 轉依義不成  
依止勝相品中四差別品 應六  
此阿黎耶識差別云何若略說或三種或四種差別三種者熏習異故謂言說我見有分熏習差別四種者謂引生果報緣相相貌差別引生差別者是熏習新生若無此緣行生

識緣取生有是義不成果報差別者依行於  
 六道中此法成熟若無此後時受生所有諸  
 法生起不有此義不成緣相差別者於此心  
 中有相能起我執若無此於餘心中執我相  
 境此義不成相貌差別者此識有共相有不  
 共相無受生種子相有受生種子相共相者  
 是器世界種子不共相者是各別內入種子  
 復次共相者是無受生種子不共相者是有  
 受生種子若對治起時不共所對治滅於共  
 種子識他分別所持正見清淨譬如修觀行  
 人於一類物種種願樂種種觀察隨心成立  
 此中說偈  
 難滅及難解 說名為共結 觀行人心異  
 由相大成外 清淨人未滅 此中見清淨  
 成就淨佛土 由佛見清淨

復有別偈 卷六 十九  
 種種願及見 觀行人能成 於一類物中  
 隨彼意成故 種種見成故 所求唯有識  
 是不共本識差別有覺受生種子若無此眾  
 生世界生緣不成是共阿黎耶識無受生種  
 子若無此器世界生緣不成復次麤重相識  
 細輕相識麤重相識者謂大小二惑種子細  
 輕相識者謂一切有流善法種子若無此由  
 前業果有勝能依止差別不得成復次有流  
 善法種子若無此由前業果有勝能無勝能  
 依止差別不得成復次有受不受相二種本  
 識有受相者果報已熟善惡種子識不受相  
 者名言熏習種子無量時戲論生起種子故  
 若無此識有作不作善惡二業因與果報故  
 受用盡義不成始生名言熏習生起亦不得

成復次有譬喻相識如幻事鹿渴夢想翳闇等譬第一識似如此事若無此虛妄分別種子故此識不成顛倒因緣復有具不具相若具縛眾生有具相若得世間離欲有損害相若有學聲聞及諸菩薩有一分滅離相若阿羅漢獨覺單滅惑障如來雙滅惑智二障若無此煩惱次第滅盡則不得成何因緣善惡二法果報唯是無覆無記性此無記性與善惡二法俱生相違善惡二法自互相違若果報成善惡性無方便得解脫煩惱又無方便得起善及煩惱故無解脫及繫縛無此二義故是故果報識定是無覆無記性

應知勝相品第二之一

如此已說應知依止勝相云何應知勝相此

應知相略說有三種一依他性相二十二分別性相三真實性相依他性相者本識為種子虛妄分別所攝諸識差別何者為差別謂身識身者識受者識應受識正受識世識數識處識言說識自他差別識善惡兩道生死識身識身者識受者識應受識正受識世識數識處識言說識如此等識因言說熏習種子生自他差別識因我見熏習種子生善惡兩道生死識因有分熏習種子生由如此等識一切界道煩惱所攝依他性為相虛妄分別即得顯現如此等識虛妄分別所攝唯識為體非有虛妄塵顯現依止是名依他性相分別性相者實無有塵唯有識體顯現為塵是名分別性相真實性相者是依他性由此塵相永無所有此實不無是名真實性相由身識

身者識受者識應知攝眼等六內界以應受  
識應知攝色等六外界以正受識應知攝眼  
等六識界由如此等識為本其餘諸識是此  
識差別如此眾識唯識以無塵等故譬如夢  
等於夢中離諸外塵一向唯識種種色聲香

塵六

三十一

味觸舍林地山等諸塵如實顯現此中無一  
塵是實有由如此譬一切處應知唯有識由  
此等言應知幻事鹿渴翳闇等譬若覺人所  
見塵一切處唯有識譬如夢塵如人夢覺了  
別夢塵但唯有識於覺時何故不爾不無此  
義若人已得真如智覺不無此覺譬如人正  
在夢中未覺此覺不生若人已覺方有此覺  
如此若人未得真如智覺亦無此覺若已得  
真如智覺必有此覺若人未得真如智覺於  
唯識中云何得起此智由聖教及真理可得

比度聖教者如十地經中佛世尊言佛子三  
界者唯有識又如解節經中說是時彌勒菩  
薩摩訶薩問佛世尊世尊此色相是定心所  
緣境為與心異與心不異佛世尊言彌勒與  
心不異何以故我說唯有識此色相境界識  
所顯現彌勒菩薩言世尊若定境界色相與  
定心不異云何此識取此識為境佛世尊言  
彌勒無有法能取餘法雖不能取此識如此  
變生顯現如塵譬如依面見面謂我見影顯  
現相似異面定心亦爾顯現似塵謂異定心  
由此阿舍及所成道理唯識義顯現云何如  
此是時觀行人心正在觀中若見青黃等遍  
入色相即見自心不見餘境青黃等色由此  
道理一切識中菩薩於唯識應作如此比知  
於青黃等識非憶持識以見境在現前故於

聞思兩位憶持意識此識緣過去境似過去境起是故得成唯識義由此比知菩薩若未得真如智覺於唯識義得生比知是種種識前已說譬如幻事夢等於中眼識等識唯識義可成眼色等識有色唯識義云何可見此等識由阿舍及道理如前應知若色是識云何顯現似色云何相續堅住前後相似由顛倒等煩惱依止故若不爾於非義義顛倒不得成若無義顛倒惑障及智障二種煩惱則不得成若無二障清淨品亦不得成是故諸識如此生起可信是實此中說偈

亂因及亂體 色識無色識 若前識不有後識不得生

云何身識身者識受者識應受識正受識於一切生處更互密合生具足受生所顯故云

何世識等如前說有種種差別生無始生死相續不斷故無量眾生界所攝故無量器世界所攝故無量作事更互顯示所攝故無量攝及受用差別所攝故無量受用愛憎業果報所攝故無量生及死證得差別所攝故云

何正辯如此等識令成唯識義若略說有三相諸識則成唯識唯有識量外塵無所有故唯有二謂相及見識所攝故由種種生相所攝故此義云何此一切識無塵故成唯識有相有見眼等諸識以色等為相故眼等諸識以諸識為見故意識以一切眼識乃至法識為相故意識以意識為見故云何如此意識能分別故似一切識塵分生故此中說偈

入唯量唯二 種種觀人說 通達唯識時及伏離識位

諸師說此意識隨種種依止生起得種種名譬如作意業得身口等業名此識於一切依止生種種相貌似二種法顯現一似塵顯現二似分別顯現一切處似觸顯現若在有色界意識依身故生譬如有色諸根依止身生此中說偈

遠行及獨行 無身住空窟 調伏難調伏 則解脫魔縛

如經言此眼等五根所緣境界一一境界意識能取分別意識為彼生因復有別說分別說十二入中是六識聚說名意入是處安立本識為義說此中一切識說名相識意及依止識應知名見識何以故此相識由是見生因顯現似塵故作見生依止事如此諸識成立唯識云何諸塵現前顯現知其非有如佛

世尊說若菩薩與四法相應能尋能入一切識無塵何者為四一知相違識相譬如餓鬼畜生人天於同境界由見識有異二由見無境界識譬如於過去未來夢影塵中三由知離功用無顛倒應成譬如實有塵中緣塵起識不成顛倒不由功用如實知故四由知義隨順三慧云何如此一切聖人入觀得心自在由願樂自在故如願樂塵種種顯現故若觀行人已得奢摩他循法觀加行隨順思惟義顯現故若人得無分別智未出無分別觀一切塵不顯現故由境界等義隨順三慧由前引證成就唯識義故知唯識無塵此中有六偈重顯前義此偈後依智覺中當廣分別說謂餓鬼畜生人如是等

攝大乘論卷上

音釋

序

謀達協切與牒 鏹悲驕切馬 桀巨列切一  
 同書版也 銜外鐵也 國高為桀  
 涪何交切 苻才甸切 危魚委切 紇下沒切 姑洗  
 雜也 再也 危魚委切 紇下沒切 姑洗  
 洗蘇典切 紕紕篇夷切紕繆也 駘堂來  
 姑洗律名 紕文運切 紕亂也 駘切  
 馬燭即約切 也 燭火炬也

攝大乘論卷中

隱七

陳 天竺三藏 眞諦 譯

應知勝相品第二之二

若唯識似塵顯現依止說名依他性云何成  
依他何因緣說名依他從自熏習種子生故  
繫屬因緣不得自在若生無有功能過一刹  
那得自住故說名依他若分別性依依他實  
無所有似塵顯現云何成分別何因緣說名  
分別無量相貌意識分別顛倒生因故成分  
別無有自相唯見分別故說名分別若眞實  
性分別性求無所有爲相云何成眞實何因  
緣說名眞實由如無不如故成眞實由成就  
清淨境界由一切善法中最勝於勝義成就  
故說名眞實復次若有分別及所分別分別  
性成此中何法名分別何法所分別何法名

分別性意識是分別具三種分別故何以故  
此識自言熏習爲種子及一切識言熏習爲  
種子是故此生由無邊分別一切處分別但  
名分別說名分別此依他但是所分別是因  
能成依他性爲所分別此中名分別性云何  
分別能計度此依他性但如萬物相緣何境  
界執何相貌云何觀見云何緣起云何言說  
云何增益由名等境界於依他性中由執著  
相由決判起見由覺觀言說緣起由見等四  
種言說實無有塵計實有爲增益由此因故  
能分別此三種性云何與他爲異爲不異非  
異非不異應如此說有別義依他性名依他  
有別義此成分別有別義此成眞實何者別  
義說此名依他從熏習種子生繫屬他故復  
有何義此成分別此依他性爲分別因是所

分別故成分別復有何義此成真實此依他性<sub>一</sub>或成真實如所分別實不如是有故復有何義由此一識成一切種種識相貌本識識所餘生起識種種相貌故復因此相貌生故依他性有幾種若略說有二種一繫屬熏習種子二繫屬淨品不淨品性不成就故由此二種繫屬說名依他分別性亦有二種一由分別自性二由分別差別真實性亦有二種一自性成就二清淨成就復有分別更成四種一分別自性二分別差別三有覺四無覺有覺者能了別名言眾生分別無覺者不能了別名言眾生分別復次分別有五種一依名分別義自性譬如此名目此義二依義分別名自性譬如此義屬此名三依名分別名自性譬如分別未識義名四依義分別義

自性譬如分別未識名義五依二分別二自性譬如此名此義何義何名若攝一切分別復有十種一根本分別謂本識二相分別謂色等識三依顯示分別謂有依止眼等識識四相變異分別謂老等變異苦樂等受欲等惑及在時節等變異地獄等欲界等變異五依顯示變異分別謂如前所說變異起變異分別六他引分別謂聞非正法類聞正法類分別七不如理分別謂正法外人非正法類分別八如理分別謂正法內人聞正法類分別九決判執分別謂不如理思惟種類身見為根本與六十二見相應分別十散動分別謂菩薩十種分別無有相散動有相散動增益散動損減散動一執散動異執散動通散動別散動如名起義散動如義起名散動為

對治此十種散動分別故於一切般若波羅蜜教中佛世尊說無分別智能對治此十種散動應知具足般若波羅蜜經義如般若波羅蜜經言云何菩薩行於般若波羅蜜舍利弗是菩薩實有菩薩不見有菩薩不見菩薩名不見般若波羅蜜不見行不見不行不見色不見受想行識何以故由自性空不由空空見色空非色無色異空故色即是空空即是色何以故舍利弗此但有名所謂色是自性無生無滅無染無淨對假立名分別諸法由假立客名隨說諸法如如隨說如是如是生起執著如此一切名菩薩不見若不見不生執著如觀色乃至識亦應作如此觀由此般若波羅蜜經文句應隨順思惟十種分別義若由此別意依他性成有三性是三性云

何性有三異不成相雜無相雜義由此道理此性成依他不由此成分別及真實由此道理此性成分別不由此成依他及真實由此道理此性成真實不由此成依他及分別云何得知此依他性由分別性顯現似法不與分別性同體未得名前於義不應生智故法體與名一則此義相違由名多故若名與義一名既多義應成多此義體相違由名不定體相雜此義相違此中說偈

於名前無智 多名及不定 義成由同體  
多雜體相違 法無顯似有 無染而有淨  
是故譬幻事 亦以譬虛空

云何如此顯現而實非有依他性一切種非不有若無依他性真實性亦無一切無不成若無依他性及真實性則有無染汙及清淨

品過失此二品可知非無是故非一切皆無  
此中說偈

若無依他性 真實性亦無 則恒無二品  
謂染汙清淨

諸佛世尊於大乘中說鞞佛略經此經中說  
云何應知分別性由說無有品類此性應知  
云何應知依他性由說幻事鹿渴夢相影光  
影響水月變化如此等譬應知其性云何應  
知真實性由說四種清淨法應知此性四種  
清淨法者一此法本來自性清淨謂如如空  
實際無相真實法界二無垢清淨謂此法出  
離一切客塵障垢三至得道清淨謂一切助  
道法及諸波羅蜜等四道生境界清淨謂正  
說大乘法何以故此說是清淨因故非分別  
清淨法界流故非依他由此四種清淨法攝

隱七

五

一切清淨法皆盡此中說偈  
幻等顯依他 說無顯分別 若說四清淨  
此說屬真實 清淨由本性 無垢道緣緣  
一切清淨法 四皆攝品類

何因何緣是依他性如經所說幻事等譬所  
顯於依他性中為除他虛妄疑惑云何他於  
依他性中生虛妄疑惑諸說於依他性中有  
如此虛妄疑心若實無有物云何成境界為  
決此疑故說幻事譬若無境界心及心法云  
何得生為決此疑故說鹿渴譬若實無塵愛  
非愛受用云何得成為決此疑故說夢相譬  
若實無法善惡二業愛非愛果報云何得生  
為決此疑故說影譬若實無法云何種種智  
生為決此疑故說光影譬若實無法云何種  
種言說起為決此疑故說谷響譬若實無法

云何成緣真實法定心境界為決此疑故說  
水月譬若實無法云何諸菩薩故作心無顛  
倒心為他作利益事於六道受生為決此疑  
故說變化譬婆羅門問經中言世尊依何義  
說如此言如來不見生死不見涅槃於依他  
性中依分別性及依真實性生死為涅槃依  
無差別義何以故此依他性由分別一分成  
生死由真實一分成涅槃阿毗達磨脩多羅  
中佛世尊說法有三種一染汗分二清淨分  
三染汗清淨分依何義說此三分於依他性  
中分別性為染汗分真實性為清淨分依他  
性為染汗清淨分依如此義故說三分於此  
義中以何為譬以金藏土為譬譬如於金藏  
土中見有三法一地界二金三土於地界中  
土非有而顯現金實有不顯現此土若以火

燒鍊土則不現金相自現此地界土顯現時  
由虛妄相顯現金顯現時由真實相顯現是  
故地界有二分如此本識未為無分別智火  
所燒鍊時此識由虛妄分別性顯現不由真  
實性顯現若為無分別智火所燒鍊時此識  
由成就真實性顯現不由虛妄分別性顯現  
是故虛妄分別性識即依他性有二分譬如  
金藏土中所有地界復次有處世尊說一切  
法常住有處說一切法無常有處說非常非  
無常依何義說常此依他性由真實性分常  
住由分別性分無常由二性分非常非無常  
如依此義說常無常無二如此說苦樂無二  
善惡無二空不空無二有我無我無二靜不  
靜無二有性無性無二有生無生無二有滅  
無滅無二本來寂靜不寂靜無二本來涅槃

非涅槃無二生死涅槃無二由如此等差別諸佛如來依義密語由此三性應隨決了常無常等正說如前解釋此中說偈

如法實不有 如彼種種現 由此法非法

故說無二義 依一分說言 或有或非有

依二分說言 非有非非有 如顯現不有

是故說末無 如顯現實有 是故說非無

由自體非有 自體不住故 如取不有故

三性成無性 由無性故成 前為後依止

無生滅本靜 及自性涅槃

復次有四意四依一切佛世尊教應隨決了

一平等意譬如說昔是時中我名毗婆尸

久已成佛二別時意譬如說若人誦持多

寶佛名決定於無上菩提不更退墮復有說

言由唯發願得安樂佛土得往彼受生三別

義意譬如說事如是等恒伽所有沙數諸

佛於大乘別義得生覺了四衆生樂欲意譬

如如來先為一人讚歎布施後還毀咎如施

戒及餘修亦爾是名四種意四依者一令入

依譬如於大小乘中佛世尊說人法二種通

別二相所攝俗諦二相依譬如隨所說法相

中必有三性三對治依此中八萬四千衆生

煩惱行對治顯現四翻依此中由說別義言

詞以顯別義譬如偈言

阿婆離婆羅摩多耶 毗跋耶斯者修締多

離施那者僧柯履多 羅槃底菩提物多摩

若人欲廣解釋大乘法略說由三相應當如

此解釋一廣解緣生體相二廣解依因緣已

生諸法實相三廣解成立所說諸義廣解緣

生體相者如偈說言熏習所生諸法此從彼

如此果報識及生起識由更互因生廣解釋  
依因緣已生諸法實相者諸法者謂生起識  
為相有相及見識為自性復次諸法依止為  
相分別為相法爾為相由此言說於三性中  
諸法體相則得顯現如偈言

從有相有見 應知法三相

應七

八

云何得解說此法相分別性於依他性實無  
所有真實性於中實有由此二不有有故非  
得及得未見已見真如一時自然成於依他  
性中分別性無故真實性有故若見彼不見  
此若不見彼即見此如偈言

依他中分別 無但真實有 故不得及得  
於中二平等

廣解成立所說諸義者譬如初所說文句由  
所餘諸句顯示分別或由功德依止或因事

義依止功德依止者廣說佛世尊功德最清  
淨慧無二行無相法為勝依意行住於佛住  
至得諸佛平等行無礙行不可破無對轉法  
不可變異境不可思惟所成立法至三世平  
等於一切世界現身於一切法智慧無礙一  
切行與智慧相應於法智無疑不可分別身  
一切菩薩所受智慧至無二佛住波羅蜜至  
無差別如來解脫智究竟已得無邊佛地平  
等法界為勝虛空界為後邊最清淨慧如此  
初句由所餘句次第應知分別解釋若如此  
正說法義得成應七最清淨慧者諸佛九如來智慧  
於一切法清淨無不了別如此本義應知由  
二十一佛功德所攝於所知一切無障行起  
功德於有無無二相真如最清淨令入功德  
不由功用不捨如來事佛住功德於法身依

止及意事無差別功德修習一切障對治功德降伏一切外道功德生於世間非世間法所染汙功德安立正法功德四種善巧答他問功德於一切世界中顯現應化身功德能決他疑功德由種種行能令他入功德於未來世法生智功德隨衆生樂顯現功德能行無量依止衆生正教化事功德平等法身波羅蜜成就功德隨衆生意顯現純淨佛土功德是三種佛身無離無別處功德窮生死際能生一切衆生利益安樂功德由無盡功德因事義依止者如經言若菩薩與三十二法相應說名菩薩於一切衆生與利益安樂意相應令入一切智智意我今於何處意當相應如此智捨高慢心堅固善意非假作憐愍意不貪報恩於親非親所平等意求作善友

意乃至無餘涅槃稱量談說歡笑先言於諸衆生慈悲無異於所作事無退弱心無厭倦心聞義無足於自作罪能顯其過於他作罪不恠訶責於一切威儀中恒持菩提心不求果報而行布施不著一切怖畏及道生受持禁戒於一切衆生忍辱無礙爲引攝一切善法行於精進修三摩提滅離無色定與方便相應智四攝相應方便於持戒破戒中善友無二事善知識恭敬心聽法恭敬心樂住阿蘭若處於世間希有不生安樂心於下品乘不生喜樂心於大乘教觀實功德陸七遠離惡友敬事善友恒持四種梵住持無量心清淨恒遊戲五神通恒依智慧行於住正行不住正行衆生無捨離心引攝大衆一向決定言說恭敬實事先恭敬行菩薩心與如此等法相

應說名菩薩由如此文句前說初句應知解  
說初句者謂於一切衆生利益安樂意此利  
益安樂意文句別有十六文句所顯業應知  
解說十六業者一傳傳行業二無倒業三不  
由他事自行業四不可壞業五無求欲業有  
三句解釋應知不貪報恩有恩無恩衆生不  
生愛憎心隨順行乃至餘生隨處相應言說  
業有二句解釋應知有苦有樂無二衆生平  
等業無下劣業不可令退轉業攝方便業狀  
惡所對治業有二句解釋應知無間思量業  
行進勝位業有七句解釋應知正修加行六  
波羅蜜恭敬行四攝成就方便業有六句解  
釋應知事善知識聽聞正法住阿蘭若處遠  
離邪覺觀正思惟功德有二句顯事善友功  
德有二句顯成就業有三句解釋應知治無

量心清淨得威德證得功德安立他業有四  
句解釋應知引攝大衆無疑心立正教學處  
法財二攝無染汙心如此等句應知解釋初  
說文句此中說偈  
取如前說句 隨德句差別 取如前說句  
由義別句別  
應知入勝相品第三  
如此已說應知勝相云何應知應知入勝相  
多聞所熏習依止非阿黎耶識所攝如阿黎  
耶識成種子正思惟所攝似法及義顯相所  
生似所取種類有見意言分別何人能入應  
知相大乘多聞熏習相續已得成事無量出  
世諸佛已入決定信樂正位由善成熟修習  
增長善根是故善得福德智慧二種資糧諸  
菩薩於何處入唯識觀有見似法義顯相意

言分別大乘法相所生於願樂行地入謂隨  
聞信樂故見道謂如理通達故修道謂能對  
治一切障故究竟道中一切法實唯有識如  
說隨聞信樂故如理通達故能對治一切障  
故出離障垢最清淨故云何得入由善根力  
持故由有三相練磨心故由滅除四處障故  
緣法義為境無間修恭敬修奢摩他毗鉢舍  
那無放逸故十方世界無數量故不可數量  
在人道衆生刹那刹那證得無上菩提是名  
第一練磨心由此正意施等諸波羅蜜必得  
生長是我信樂已得堅住由此正意我修習  
施等波羅蜜進得圓滿則為不難是名第二  
練磨心若人與衆善法相應後捨命時於一  
切受生中可愛富樂自然而成是人得有礙  
善此義尚應成云何我得圓滿善及無礙善

一切如意可愛富樂而當不成是名第三練  
磨心此中說偈

人道中衆生 念念證菩提 處所過數量  
故無下劣心 善心人信樂 能生施等度  
勝人得此意 故能修施等 若善人死時  
即得勝富樂 滅位圓淨善 此義云何無  
由滅除四處故由捨離聲聞獨覺思惟故邪  
思惟滅於大乘中生信心及決了心故滅一  
切邪意及疑是所聞思諸法中捨離我及我  
所邪執故是故滅除法執安立現前住一切  
相思惟悉不分別是故能滅除分別此中說  
偈  
現在及安立 一切相思惟 智人不分別  
故得無上覺  
緣法及義為境何因何方便得入由聞熏習

種類正思惟所攝顯現似法及義有見意言  
分別故由四種尋思謂名義自性差別假立  
尋思由四種如實智謂名義自性差別如實  
智四種不可得故若菩薩已入已解如此等  
義則修加行爲入唯識觀於此觀中意言分  
別似字言及義顯現此中是字言相但意言  
分別得如此通達此義依名言唯意言分別  
亦如此通達此名義自性差別唯假說爲量  
亦如此通達次於此位中但證得唯意言分  
別是觀行人不見名及義不見自性差別假  
說由實相不得有自性差別義已由四種尋  
思及四種如實智於意言分別顯現似名及  
義得入唯識觀於唯識觀中入何法如何法  
得入但入唯量相見二法種種相貌名義自  
性差別假說自性差別義六種相無義故由

此能取所取非有爲義故一時顯現似種種  
相貌及生故譬如閻中藤顯現似蛇猶如於  
藤中蛇即是虛實不有故若人已了別此藤  
義先時蛇亂智不緣境起即便謝滅唯藤智  
在此藤智由微細分析虛空無實境何以故  
但是色香味觸相故若心緣此境藤智亦應  
可滅若如此見已伏滅六相顯現似名及義  
意言分別塵智不生譬如蛇智於伏滅六相  
義中是唯識智亦應可伏滅譬如藤智由依  
真如智故如此菩薩由入似義顯現意言分  
別相故得入分別性由入唯識義故得入依  
他性及云何得入真實性若捨唯識想已是  
時意言分別先所聞法熏習種類菩薩已了  
別伏滅塵想似一切義顯現無復生緣故不  
得生是故似唯識意言分別亦不得生由此

義故菩薩唯住無分別一切義名中由無分別智得證得住真如法界是時菩薩平等平等能緣所緣無分別智生由此義故菩薩得入真實性此中說偈

法人及法義隱七性略及廣名十四不淨淨究竟

十名差別境

如此菩薩由入唯識觀故得入應知勝相由入此相得入初歡喜地善通達法界得生十方諸佛如來家得一切眾生心平等得一切菩薩心平等得一切諸佛如來心平等此觀名菩薩見道

復次何故菩薩入唯識觀由緣極通法為境出世奢摩他毗鉢舍那智故由無分別智後所得種種相識為相智故為滅除共本阿黎耶識中一切有因諸法種子為生長能觸法

身諸法種子為轉依為得一切如來正法為得一切智智故入唯識觀無分別智後所得智者於本識及所生一切識識及相識相中由觀似幻化等譬自性無顛倒由此義故菩薩如幻師於一切幻事自了無倒於一切相

因緣及果中若正說時常無偏倒

是時正入唯識觀位中有四種三摩提是四種通達分善根依止菩薩云何應見由四種尋思於下品無塵觀忍光得三摩提是暖行通達分善根依止於最上品無塵觀忍光增十五

三摩提是頂行通達分善根依止於四種如實智菩薩已入唯識觀了別無塵故正入真義一分通行三摩提是隨非安立諦忍依止此三摩提最後刹那了伏唯識想轉名無間三摩提應知是世第一法依止四種三摩提

是菩薩入非安立諦觀前方便若菩薩如此  
 入初地已得見道得通達入唯識云何菩薩  
 修習觀行入於修道如佛廣說所安立法相  
 於菩薩十地由攝一切如來所說大乘十二  
 部經故得現前由治所說通別二境由生起  
 緣極通境出世無分別智及無分別智後所  
 得奢摩他毗鉢舍那智由無量無數百千拘  
 胝大劫中依數數修習由昔及今所轉依為  
 大得三種佛身更修加行是聲聞見道是菩  
 薩見道此二見道差別云何聲聞菩薩見道  
 應知有十一種差別何者為十一一由境界  
 差別謂緣大乘法為境二由依止差別謂依  
 大福德智慧資糧為依止三由通達差別謂  
 通達人法二無我四由涅槃差別謂攝無住  
 處涅槃以為住處五由地差別謂依十地為

出離六七由清淨差別謂滅煩惱習氣及治  
 淨土為清淨八由於一切眾生得平等心差  
 別謂為成熟眾生不捨加行功德善根九由  
 受生差別謂生如來家為生故十由顯現差  
 別謂於佛子大集論中常能顯現為攝受正  
 法十一由果差別謂十力無畏不共如來法  
 及無量功德生為果故此中說兩偈  
 名義互為客 菩薩應尋思 應觀二唯量  
 及彼二假說 從此生實智 離塵分別三  
 若見其非有 得入三無性  
 又正教兩偈如分別觀論說 應七  
 菩薩在靜位 觀心唯是影 捨離外塵相  
 唯定觀自想 菩薩住於內 入所取非有  
 次觀能取空 後觸二無得  
 復有大乘莊嚴經論所說五偈為顯此道

菩薩生長福及慧 二種資糧無量際  
 於法思惟心決定 能了義類分別因  
 已知義類但分別 得住似義唯識中  
 故觀行人證法界 能離二相及無二  
 若離於心知無餘 由此即見心非有  
 智人見此二不有 得住無二真法界  
 由無分別智慧人 恒平等行遍一切  
 染衣稠密過聚性 遣滅如藥能除毒  
 佛說正法善成立 安心有相於法界  
 已知憶念唯分別 功德海岸智人至  
 入因果勝相品第四  
 如此已說入應知勝相云何應知入因果勝  
 相由六波羅蜜謂陀那尸羅羸提毗梨耶持  
 訶那般羅若波羅蜜云何由六波羅蜜得入  
 唯識復云何六波羅蜜成入唯識果此正法

內有諸菩薩不著富樂心於戒無犯過心於  
 苦無壞心於善修無懶惰心於此散亂因中  
 不住著故常行一心如理簡擇諸法得入唯  
 識觀由依止六波羅蜜菩薩已入唯識地次  
 得清淨信樂意所攝六波羅蜜是故於此中  
 間設離六波羅蜜加行功用由信樂正說愛  
 重隨喜願得思惟故恒無休息行故修習六  
 波羅蜜究竟圓滿此中說偈  
 修習圓白法 能得利疾忍 菩薩於自乘  
 甚深廣大說 覺唯分別故 得無著智故  
 是樂信清淨 各清淨意地 菩薩在法流  
 前後見諸佛 已知菩提近 無難易得故  
 何故波羅蜜唯有六數為安立能對治六種  
 惑障故為一切佛法生起依處故為隨順成  
 熟一切衆生依止故為對治不發行心因故

立施戒二波羅蜜不發行心因者貪著財物及至室家若已發修行心為對治退弱心因故立忍精進二波羅蜜退弱心因者謂生死衆生違逆若事長時助善法加行疲怠若已起發行及不退弱心為對治壞失心因故立定慧二波羅蜜壞失心因者謂對亂邪智是故為對治六種惑障立波羅蜜有六數為一切佛法生起依處故者前四波羅蜜是不散亂因次一波羅蜜是不散亂體由依止此不散亂故能如實覺了諸法真理一切如來正法皆得生起是故為一切佛法生起依處立波羅蜜有六數為隨順成熟一切衆生依止故者由施波羅蜜利益衆生由戒波羅蜜不損惱衆生由忍波羅蜜能安受彼毀辱不起報怨心由精進波羅蜜生彼善根滅彼惡根

由此利益因一切衆生皆得調伏次彼心未得寂靜為令寂靜已得寂靜為令解脫故立定慧二波羅蜜由此六度菩薩善教衆生故得成熟是故為道順成熟一切衆生依止立波羅蜜有六數由如此義是故應知成立波羅蜜有六數

此六波羅蜜相云何可見由六種最勝六波羅蜜通相有六一由依止無等謂依止無上菩提心起二由品類無等謂一波羅蜜略說皆有三品菩薩皆具修行三由行事無等謂安樂利益一切衆生事菩薩所行諸度皆為成此二事故四由方便無等謂無分別智菩薩所行諸度皆是無分別智所攝故五由迴向無等謂迴向無上菩提菩薩所行諸度決定轉趣一切智果故六由清淨無等謂感

智二障永滅無餘菩薩所行諸度分分除二障乃至皆盡故施即是波羅蜜波羅蜜即是施耶有是施非波羅蜜有是波羅蜜非施有是施是波羅蜜有非施非波羅蜜如施中四句應知餘度亦有四句

云何說六波羅蜜如此次第前前波羅蜜隨順次生後後波羅蜜故復次前前波羅蜜由後後波羅蜜所清淨故

依何義立六度名此義云何可見於一切世間聲聞獨覺施等善根中最勝無等故以能到彼岸故是故通稱波羅蜜能破滅恚惜嫉妬及貧窮下賤苦故稱陀復得爲大富主及能引福德資糧故稱那能寂靜邪戒及惡道故名尸復能令得善道及三摩提故稱羅能滅除瞋恚及忿恨心故名羸復能生自他平

和事故稱提能滅除懶惰及諸惡法名毗梨復行不放逸生長無量善法故稱耶能滅除散亂故名持訶及能引心令住內境故稱那能滅一切見行能除邪智故名般羅能緣真相隨其品類知一切法故稱若

云何應知諸波羅蜜修習若略說應知修習有五種一修加行方法二修信樂三修思惟四修方便勝智五修利益他事此中前四修應知如前利益他事修者諸佛無功用心不捨如來事修習諸波羅蜜至圓滿位中更修諸波羅蜜

復次思惟修習者愛重隨喜願得思惟六意攝所修六意者一廣大意二長時意三歡喜意四有恩德意五大志意六善好意廣大意者若菩薩若干阿僧祇劫能得無上菩提以

如此時爲一剎那剎那菩薩於此時中剎那剎那常捨身命及等恒伽沙數世界滿中七寶奉施供養如來從初發心乃至入住究竟清涼菩提是菩薩施意猶不滿足如此多時剎那剎那滿三千大千世界熾火菩薩於中行住坐卧爲四威儀離一切生<sub>二十</sub>之具戒忍精進三摩提般若心菩薩恒現前修乃至入住究竟清涼菩提菩薩戒忍等意亦不滿足是無厭足心是名菩薩廣大意若菩薩從初發心乃至成佛不捨無厭足心是名菩薩長時意若菩薩由六波羅蜜所作利益他事常生無等歡喜衆生得益其心歡喜所不能及是名菩薩歡喜意若菩薩行六波羅蜜利益衆生已見衆生於我有大恩德不見自身於彼有恩是名菩薩有恩德意若菩薩從六波

羅蜜所生功德善根施與一切衆生以無著心迴向爲令彼得可愛重果報是名菩薩大志意若菩薩所行六波羅蜜功德善根令一切衆生平等皆得爲彼迴向無上菩提是名菩薩善好意由此六意所攝愛重思惟菩薩修習若菩薩隨喜無量菩薩修加行六意所生功德善根是名菩薩六意所攝隨喜思惟若菩薩願一切衆生修行六意所攝六波羅蜜及願自身修行六意所攝六波羅蜜修習加行乃至成佛是名菩薩六意所攝願得思惟若人得聞六意所攝菩薩思惟修習生一念信心是人則得無量無邊福德之聚諸惡業障壞滅無餘若人但聞尚得無量無邊福德何況菩薩盡能修行

云何應知諸波羅蜜差別由各有三品知其

差別施三品者一法施二財施三無畏施戒  
三品者一守護戒二攝善法戒三攝利眾生  
戒忍三品者一他毀辱忍二安受苦忍三觀  
察法忍精進三品者一勤勇精進二加行精  
進三不下難壞無足精進定三品者一安樂  
住定二引神通定三隨利他定般若三品者  
一無分別加行般若二無分別般若三無分  
別後得般若

云何應知諸波羅蜜攝義一切善法皆入六  
波羅蜜攝以為彼性故彼是六波羅蜜所流  
果故一切善法所隨成故

云何應知諸波羅蜜所對治攝一切惑以為  
彼性故為彼生因故為彼所流果故

云何應知諸波羅蜜功德若菩薩輪轉生死  
大富位自在所攝大生所攝大眷屬徒眾所

攝大資生業事成就所攝無疾惱少欲等所  
攝一切工巧明處聰慧所攝如意無失富樂  
利益眾生為正事故菩薩修行六度功德乃  
至入住究竟清涼菩提恆在不異故

云何應知諸波羅蜜更互相顯世尊或以施  
名說諸波羅蜜或以戒名或以忍名或以精  
進名或以定名或以般若名說諸波羅蜜如  
來以何意作如此說於波羅蜜修行方便中  
一切餘波羅蜜皆聚集助成故此即如來說  
意此中說鬱陀那偈

位數相次第 隱七 各修差別攝 二十三 對治及功德  
互顯諸度義

攝大乘論卷中

音釋

鞞佛略  
廣梵語也  
鞞駢迷也  
此云方  
皆  
口蔣氏切  
嬰也

攝大乘論卷下

隱八

陳天竺三藏真諦譯

入因果修差別勝相品第五

如此已說入相因果勝相云何應知入因果修差別由十種菩薩地何者為十一歡喜地

二無垢地隱八三明焰地四燒然地五難勝地六

現前地七遠行地八不動地九善慧地十法

雲地云何應知以此義成立諸地為十為對

治地障十種無明故於十相所顯法界有十

種無明猶在為障何者能顯法界十相於初

地由一切遍滿義應知法界於二地由最勝

義於三地由勝流義於四地由無攝義於五

地由相續不異義於六地由無染淨義於七

地由種種法無別義於八地由不增減義於

九地由定自在依止義由土自在依止義由

智自在依止義於十地由業自在依止義由陀羅尼門三摩提門自在依止義應知法界此中說偈

遍滿最勝義 勝流及無攝 無異無染淨

種種法無別 不增減四種 自在依止義

業自在依止 總持三摩提

如此二偈依中邊分別論應當了知復次此

無明應知於二乘非染汙於菩薩是染汙云

何初地名歡喜由始得自他利益功能故云

何二地名無垢此地遠離犯菩薩戒垢故云

何三地名明焰由無退三摩提及三摩提依

止故大法光明依止故云何四地名燒然由

助菩提法能焚滅一切障故云何五地名難

勝真俗二智更互相違能合難合令相應故

云何六地名現前由十二緣生智依止故能

令般若波羅蜜現前住故云何七地名遠行由至有功用行最後邊故云何八地名不動由一切相及作意功用不能動故云何九地名善慧由最勝無礙辯智依止故云何十地名法雲由緣通境知一切法一切陀羅尼及三摩提門為藏故譬雲能覆如虛空羸障故能圓滿法身故

云何應知得諸地相由四種相一由已得信樂相於一一地決定生信樂故二由已得行相得與地相應十種法正行故三由已得通達相先於初地通達真如法界時皆能通達一切地故四由已得成就相此十地皆已至究竟修行故云何應知修諸地相諸菩薩先於地地中修習奢摩他毗鉢舍那各有五相修習得成何者為五一集總修二無相修三

無功用修四熾盛修五不知足修應知於諸地皆有此五修此五修生五法為果何者為五一刹那刹那能壞一切羸重依法二能得出離種種亂想法樂三能見一切處無量無分別相善法光明四如所分別法相轉得清淨分恒相續生為圓滿成就法身五於上品中轉增為最上上品因緣聚集於十地中修十波羅蜜隨次第成於前六地有六波羅蜜如次第說於後四地有四波羅蜜一漚和拘舍羅波羅蜜六波羅蜜所生長善根功德施與一切眾生悉令平等為一切眾生迴向無上菩提二波尼他那波羅蜜此度能引攝種種善願於未來世感六度生緣故三婆羅波羅蜜由思擇修習力伏諸波羅蜜對治故能引六波羅蜜相續生無有間缺四若那波羅

蜜此度是能成立前六度智能令菩薩於大集中受法樂度成熟衆生後四波羅蜜應知是無分別後智攝一切波羅蜜於一切地中不同時修習從波羅蜜藏經應知此法門廣顯諸義於幾時中修習十地正行得圓滿有五種人於三阿僧祇劫修行圓滿或七阿僧祇劫或三十三阿僧祇劫何者爲五行願行地人滿一阿僧祇劫行清淨意行人有相行人行無相行人於六地乃至七地滿第二阿僧祇劫從此後無功用行人乃至十地滿第三阿僧祇劫復次云何七阿僧祇劫地前三地中有四地前三者一不定阿僧祇二定阿僧祇三授記阿僧祇地中有四者一依實諦阿僧祇二依捨阿僧祇三依寂靜阿僧祇四依智慧阿僧祇復次云何三十三阿

僧祇方便地中有三阿僧祇一信行阿僧祇二精進行阿僧祇二趣向行阿僧祇於十地中地地各三阿僧祇謂入住出如此阿僧祇修行十地正行圓滿  
有善根願力 心堅進增上 三種阿僧祇

說正行成就

依戒學勝相品第六

如此已說入因果修差別云何應知依戒學差別應知如於菩薩地正受菩薩戒品中說若略說由四種差別應知菩薩戒有差別何者爲四一品類差別二共不共學處差別三廣大差別四甚深差別品類差別者有三種一攝正護戒二攝善法戒三攝衆生利益戒此中攝正護戒應知是二戒依止攝善法戒是得佛法生起依止攝衆生利益戒是成熟

衆生依止共學處戒者是菩薩遠離性罪戒  
不共學處戒者是菩薩遠離制罪所立戒此  
戒中或聲聞是處有罪菩薩於中無罪或菩  
薩是處有罪聲聞於中無罪菩薩有治身口  
意三品爲戒聲聞但有治身口爲戒是故菩  
薩有心地犯罪聲聞則無此事若略說所有  
身口意業事能生衆生利益無有過失此業  
菩薩皆應受學修行如此應知共不共戒差  
別廣大差別者應知有四種由四種廣大故  
一種種無量學處廣大二能攝無量福德廣  
大三攝一切衆生利益安樂意廣大四無上  
菩提依止廣大甚深差別者若菩薩由如此  
方便勝智行殺生等十事無染濁過失生無  
量福德速得無上菩提勝果復次有變化所  
作身口業應知是菩薩甚深戒由此戒有時

菩薩正居大王位隱八或現種種逼惱衆生爲安  
立衆生於戒律中或現種種本生由逼惱他  
及逼惱怨對令他相愛利益安心生他信心  
爲先後於三乘聖道中令彼善根成熟是名  
菩薩甚深戒差別由此四種差別應知是略  
說菩薩受持戒差別復次由此四種差別更  
有差別不可數量菩薩戒差別如毗那隸沙  
毗佛略經中說  
依心學勝相品第七  
如此已說依戒學差別云何應知依心學差  
別略說由六種差別應知何者爲六一境差  
別二衆類差別三對治差別四隨用差別五  
隨引差別六由事差別境差別者由緣大乘  
法爲境起故衆類差別者大乘光三摩提集  
福德王三摩提賢護三摩提首楞伽摩三摩

提等攝種種三摩提品類故對治差別者由緣一切法爲通境智慧如以楔出楔方便故於本識中拔出一切羸重障故隨用差別者於現世久安住三摩提樂中如意能於勝處受生隨引差別者能引無礙神通於一切世界由事差別者令動放光遍滿顯示轉變往還促遠爲近轉羸爲細變細爲羸令一切色皆入身中似彼同類入大集中或顯或隱具八自在伏障他神力或施他辯才及憶念喜樂或放光明能引具相大神通能引一切難行正行以能攝十種難修正行故何者爲十

一自受難修自受菩提善願故二不可迴難修由生死衆苦不令退轉故三不肯難修由衆生作惡一向對彼故四現前難修於有怨衆生現前爲行一切利益事故五無染難修

菩薩生於世間應八不爲世法之所染故六六信樂難修行於無底大乘能信樂廣大甚深義故七通達難修能通達人法二無我故八隨覺難修諸佛如來甚深不了義經能如理判故九不離不染難修不捨生死不爲生死染汙故十加行難修諸佛如來於一切障解脫中住不作功用能行一切衆生利益事乃至窮生死後際樂修如此加行故於隨覺難修諸佛如來說不了義經其義云何菩薩應隨理覺察如經言云何菩薩不損一物不施一人若菩薩善能行施無量無數於十方世界修布施行相續生起云何菩薩樂行布施若菩薩不樂行一切施云何菩薩行信施心若菩薩不行諸佛如來信心云何菩薩發行布施若菩薩於布施中不策自身云何菩薩恒遊

戲布施若菩薩無布施時云何菩薩能大行  
施若菩薩於施離娑羅想云何菩薩於施清  
淨若菩薩鬱波提貪恡云何菩薩能住於施  
若菩薩不住究竟後際云何菩薩於施自在  
若菩薩於施不得自在云何菩薩於施無盡  
若菩薩不住無盡中如施經於戒乃至般若  
如理應知復有經言云何菩薩行殺生若菩  
薩有命衆生斷其相續云何菩薩奪非他所  
與若菩薩自奪非他所與衆生云何菩薩行  
邪淫若菩薩於欲塵起邪意等云何菩薩能  
說妄語若菩薩是妄能說爲妄云何菩薩行  
兩舌若菩薩恒住最極空寂處云何菩薩能  
住波留師若菩薩住所知彼岸云何菩薩能  
說不相應語若菩薩能分破諸法隨類解釋  
云何菩薩行阿毗持訶婁若菩薩數數令自

身得無上諸定云何菩薩起憎害心若菩薩  
於自他心地能害諸惑云何菩薩起邪見若  
菩薩一切處遍行邪性如理觀察復有經言  
佛法甚深何者甚深此論中自廣分別一切  
佛法常住爲性由法身常住故一切佛法皆  
斷由一切障皆斷盡故一切佛法生起爲性  
由化身恒生起故一切佛法能得爲性能得  
共對治衆生八萬四千煩惱行故一切佛法  
有欲爲性有欲衆生愛攝令成自體故一切  
佛法有瞋爲性一切佛法有癡爲性一切佛  
法凡夫法爲性一切佛法無染著爲性成就  
真如一切障不能染故一切佛法不可染著  
諸佛出現於世非世法所能染故是故說佛  
法甚深爲修行波羅蜜爲成熟衆生爲清淨  
佛土爲引攝一切佛法故菩薩三摩提業差

別應知

依慧學勝相品第八

如此已說依定學差別云何應知依慧學差別由無分別智自性依止緣起境界相貌立救難攝持伴類果報等流出離究竟行善加行無分別智後得智功德無差別隱八加行無分別後得智譬威德無功用作事甚深義故應知依慧學差別由依慧學差別應知無分別智差別無分別智自性應知離五種相五相者一離非思惟故二離非覺觀地故三離滅想受定寂靜故四離色自性故五於真實義離異分別故是五相所離智此中應知是無分別智於此中如所說無分別智性中故說偈言

諸菩薩自性 五種相所離 無分別智性

於真無分別 諸菩薩依止 非心非非心

是無分別智 非思疾類故 諸菩薩因緣

有言聞熏習 是無分別智 如理正思惟

諸菩薩境界 不可言法性 是無分別智

二無我真如 諸菩薩相貌 於真如境中

是無分別智 無相無差別 相應自性義

所分別非他 字字相續故 由相應義成

離言說智慧 於所知不起 於言不同故

一切不可言 諸菩薩攝持 是無分別智

此後得行持 為生長究竟 諸菩薩伴類

說是二種道 是無分別智 五度之品類

諸菩薩果報 於佛二圓聚 是無分別智

由加行至得 菩薩等流果 於後後生中

是無分別智 由展轉增勝 諸菩薩出離

得成相應故 是無分別智 應知於十地

諸菩薩究竟	由得淨三身	是無分別智
至勝自在故	不染如虛空	此無分別智
種種重惡業	由唯信樂故	清淨如虛空
此無分別智	解脫一切障	由得及成就
如虛空無染	是無分別智	若出現於世
非世法所染	如瘧求受塵	如瘧正受塵
如非瘧受塵	三智譬如此	如愚求受塵
如愚正受塵	如非愚受塵	三智譬如此
如五求受塵	如五正受塵	如非五受塵
三智譬如此	如未識求解	如讀正受法
如解受法義	次第譬三智	如人正閉目
無分別亦爾	如人正閉目	後得智亦爾
如空無分別	無染礙異邊	如空中色現
後得智亦爾	譬摩尼天鼓	無思成自事
如此不分別	種種佛事成	非此非非此

非智非非智 與境無差別 智名無分別  
佛說一切法 自性無分別 所分別無故  
彼無無分別

此中無分別有三種一加持無分別二無分別智三無分別後智加持無分別有三種謂因緣引通數習力生起差別故無分別智亦有三種謂知足無顛倒無戲論無分別差別故無分別後智有五種謂通達憶持成立相雜如意顯示差別故為成立無分別智復說別偈

餓鬼畜生人 障八 諸天等如應 十 一境心異故  
許彼境界成 於過去未來 於夢二影中  
智緣非有境 此無轉為境 若塵成為境  
無無分別智 若此無佛果 應得無是處  
得自在菩薩 由願樂力故 如意地等成

得定人亦爾 成就簡擇人 有智得定人  
於內思諸法 如義顯現故 無分別修時  
諸義不顯故 應知無有塵 由此故無識  
此無分別智即是般若波羅蜜名異義同如  
經言若菩薩住般若波羅蜜由非處修行能  
圓滿修習所餘波羅蜜何者非處修行能圓  
滿修習所餘波羅蜜謂離五種處一離外道  
我執處二離未見真實菩薩分別處三離生  
死涅槃二邊處四離唯滅惑障知足行處五  
離不觀利益衆生事住無餘涅槃處聲聞智  
慧與菩薩智慧差別云何應知由無分別差  
別不分別陰等諸法門故由非一分差別通  
達二空真如入一切所知相故依止一切衆  
生利益事故由無住差別住無住處涅槃故  
由恒差別於無餘涅槃不墮斷盡邊際故由

隱八

十一

無上差別實無異乘勝此故此中說偈  
由智五勝異 依大悲修福 世出世富樂  
說此不爲遠  
若菩薩於世間實有亦復可知若菩薩如此  
依戒定慧學功德聚相應至十種自在於一  
切利他事得無等勝能云何於世間中見有  
衆生遭重苦難由菩薩見彼衆生有業能感  
苦報障勝樂果故由菩薩見如此若施彼樂  
具則障其生善由菩薩見彼無樂具能現前  
厭惡生死由菩薩見若施彼樂具則是生長  
一切惡法因緣由菩薩見若施彼樂具則是  
逼害餘無量衆生因緣是故菩薩不無如此  
能世間亦有如此衆生顯現此中說偈  
見業障礙善 厭現及惡增 害他彼衆生  
不感菩薩施

學果寂滅勝相品第九

如此已說依慧學差別云何應知寂滅差別  
 諸菩薩惑滅即是無住處涅槃此相云何捨  
 離惑與不捨離生死二所依止轉依為相此  
 中生死是依他性不淨品一分為體涅槃是  
 依他性淨品一分為體本依者是具淨不淨  
 品二分依他性轉依者對治起時此依他性  
 由不淨品分求改本性由淨品分求成本性  
 此轉依若略說有六種轉一益力損能轉由  
 隨信樂位住聞熏習力故由煩惱有羞行暫  
 弱行或求不行故二通達轉謂已登地諸菩  
 薩由真實虛妄顯現為能故此轉從初地至  
 六地三修習轉由未離障人是一切相不顯  
 現真實顯現依故此轉從七地至十地四果  
 圓滿轉由已離障人一切相不顯現清淨真

如顯現至得一切相自在依故五下劣轉由  
 聲聞通達人無我故由一向被生死為永捨  
 離生死故六廣大轉由菩薩通達法無我故  
 於中觀寂靜功德故為捨不捨故若菩薩在  
 下劣轉位有何過夫不官眾生利益事故過  
 離菩薩法與下乘人同得解脫此為過失諸  
 菩薩若在廣大轉位有何功德於生死法中  
 由自轉依為依故得諸自在於一切道中能  
 現一切身於世間富樂及於三乘由種種教  
 化方便勝能安立彼於正教是廣大轉功  
 德此中說偈

於凡夫覆真	於彼顯虛妄	於菩薩一回
捨虛險真實	不顯現顯現	虛妄及真實
是菩薩轉依	解脫如意故	於生死涅槃
若智起等等	生死即涅槃	二無此彼故

是故於生死 非捨非非捨 於涅槃亦爾  
無得無不得

智差別勝相品第十

如此已說寂滅差別云何應知智差別由佛

三身應知智差別一自性身二受用身三變

化身此中自性身者是諸如來法身於一切

法自在依止故受用身者諸佛種種土及大

人集轉依止所顯現此以法身為依止諸佛

土清淨大乘法受樂受用因故變化身者以

法身為依止從住兜率陀天及退受生受學

受欲塵出家往外道所修苦行得無上菩提

轉法輪大般涅槃等事所顯現故諸佛如來

所有法身其相云何若略說其相應知有五

種此中說鬱陀那偈

相證得自在 依止及攝持 差別德甚深

念業明佛身

五相者一法身轉依為相一切障及不淨品

分依他性滅已解脫一切障於一切法得自

在為能清淨性分依他性轉依為相故二曰

淨法為相由六度圓滿於法身至得十種自

在勝能為相故何者為十一命自在二心自

在三財物自在此三由施度圓滿得成四業

自在五生自在此二由戒度圓滿得成六欲

樂自在由忍度圓滿得成七願自在由精進

度圓滿得成八通慧自在此五通所攝由定

度圓滿得成九智自在十法自在此二由般

若波羅蜜圓滿得成三無二為相由無有無

二相故一切法無所有空相不無為相故復

次有為無為無二為相非惑業集所生故由

得自在能顯有為相故復次一異無二為相

諸佛如來依止不異故由無量依止能證此  
故此中說偈

我執不有故 於中無依別 如前多依證

假名說不一 性行異非虛 圓滿無初故

不一無異故 不多依真如

四常住為相真如清淨相故昔願引通最為

極故應作正事未究竟故五不可思議為相

是真如清淨自證智所知故無譬喻故非覺

觀行處故

復次此法身證得云何是觸從初所得由緣

相雜大乘法為境無分別智無分別後所得

智五相修成熟修習於一切地善集資糧能

破微細難破障故金剛譬三摩提即此三摩

提後滅離一切障故是時由依止轉成證得

應知此法身有幾自在於中得自在若略說

有五自在於中得自在一淨土顯示自身相

好無邊音不可見頂自在由轉色陰依故二

無失無量大安樂住自在由轉受陰依故三

具足一切名字文句聚等中正說自在由轉

想陰執相差別依故四變化改易引攝大集

牽白淨品自在由轉行陰依故五顯了平等

迴觀作事智自在由轉識陰依故此法身應

知為幾法依止若略說唯三諸佛如來種種

住處依止故此中說偈

諸佛如來受五喜 皆因證得自界故

二乘無喜由不證 求喜要須證佛界

由能無量作事立 由法美味欲得成

得喜最勝無有失 諸佛恒見四無盡

種種受用身依止為成熟諸菩薩善根故種

種化身依止為多成熟聲聞獨覺善根故有

幾種佛法應知攝此法身若略說有六種一  
 清淨類法由轉阿梨耶識依故由證得法身  
 故二果報類法由轉有色根依故由證得果  
 報勝智故三住類法由轉受行欲塵依故由  
 無量智慧住故四自在類法由轉種種業等  
 攝自在依故由於一切十方世界無闕六通  
 智自在故五言說類法由轉一切見聞覺知  
 言說依故由能飽滿一切衆生心正說智自  
 在故六拔濟類法由轉一切災橫過失拔濟  
 意依故由一切衆生災橫過失拔濟智自在  
 故如此六種類法所攝諸佛如來法身應知  
 諸佛法身為可說有差別為無差別由依止  
 意用業無異故應知無差別由無量正覺等  
 事故應知有差別如法身受用身亦爾由依  
 止業不異故應知無差別不由依止差別故

無差別無量依止轉依故變化身應知如受  
 用身

比法身應知與幾種功德相應與最清淨四  
 無量相應與八解脫八制入十一切入無諍  
 三摩提願智四無疑解六通慧三十二大人  
 相八十小相四種一切相清淨十力四無畏  
 四無護三念處拔除習氣無忘失法大悲十  
 八不共法一切相最勝智等諸法相應此中  
 說偈

於衆生大悲 離諸結縛意 不離衆生意  
 利樂意頂禮 解脫一切障 降伏世智者  
 應知智遍滿 心解脫頂禮 諸衆生無餘  
 能滅一切惑 害惑有染汙 常憐愍頂禮  
 無功用無著 無礙恒寂靜 一切衆生難  
 能釋我頂禮 於依及能依 應說言及智

隱八

十六

於能說無礙	說者我頂禮	故隨彼類音
行往還出離	證知諸眾生	正教我頂禮
諸眾生見尊	信敬調勝士	由他見能生
淨心我頂禮	攝受住及捨	變化及改性
得定智自在	世尊我頂禮	方便歸依淨
於中障眾生	於大乘出離	摧魔我頂禮
智滅及出離	障事能顯說	於自他兩利
降邪我頂禮	無制無過失	無染濁無住
於諸法無動	無戲論頂禮	於眾伏他說
二惑所遠離	無護無忘失	攝眾我頂禮
於利益他事	尊不過待時	所作恒無虛
無迷我頂禮	於一切行住	無非圓智事
遍知一切世	實體我頂禮	日夜六時觀
一切界眾生	與大悲相應	利樂意我禮
由行及由得	由智及由事	於一切二乘

無等我頂禮	由三身尊至	具相無上覺
一切法他疑	能除我頂禮	無繫無過失
無羸濁無住	於諸法無動	無戲論頂禮
諸佛法身不但恒與如此等功德相應復與	餘功德相應謂自性因果業相應行事功德	相應是故應知諸佛法身有無上功德此中
說偈	尊成就真如	修諸地出離
解脫諸眾生	無盡等功德	相應現於世
於三輪易現	難見人天等	
復次如來法身甚深最甚深此甚深云何可	見此中說偈	
佛無生為生	以無住為住	作事無功用
第四食為食	不異亦無量	無數量一事
最堅不堅業	無上應三身	無一法能覺

應八

十七

一切無不覺	一一念無量	有不有所顯
無欲無離欲	依欲得出離	已知欲無欲
故入欲法如	諸佛過五陰	於五陰中住
與陰非一異	不捨陰涅槃	諸佛事相雜
猶如大海水	我已正應作	他事無是思
由失尊不現	如月於破器	遍滿諸世間
由法光如日	或現得正覺	或涅槃如火
此二實不有	諸佛常住故	如來於惡事
人道及惡道	於非梵行法	住第一住我
佛一切處行	亦不行一處	於一切生現
非六根境界	諸惑已滅伏	如毒呪所害
由惑至惑盡	佛證一切智	諸惑成覺分
生死為涅槃	得成大方便	故佛難思議
由此義故十二種甚深應知謂生不住業住		
甚深安立數業甚深正覺甚深離欲甚深陰		

滅甚深成熟甚深顯現甚深菩提般涅槃顯十八  
現甚深住甚深顯自體甚深滅惑甚深不可思議甚深  
諸菩薩緣法身憶念佛此念緣幾相若略說  
諸善薩依法身修習念佛有七種相何等為  
七一諸佛於一切法至無等自在如此修習  
念佛於一切世界至得無礙無邊六通智故  
此中說偈  
被障因不具 一切衆生界 住二種定中  
諸佛無自在  
二如來身常住由真如無間解脫一切垢故  
三如來最無失一切惑障及智障永相離故  
四一切如來事無功用成不由功用恒起正  
事永不捨故  
五如來大富樂位一切佛土最微妙清淨為

富樂故

六如來最無染者出現世間非一切世法所染如塵不能染空故

七如來於世間有大事用由現成無上菩提及大般涅槃未成熟衆生令成熟已成熟衆

生令解脫故此中說偈

隱八

十九

隨屬如來心 圓德常無失 無功用能施

衆生大法樂 遍行無有礙 平等利多人

一切一切佛 智人緣此念

復次諸佛如來淨土清淨其相云何應知如

言百千經菩薩藏緣起中說佛世尊在周遍

光明七寶莊嚴處能放大光明普照無量世

界無量妙飾界處各各成立大域邊際不可

度量出過三界行處世出世善法功能所生

最清淨自在唯識為相如來所鎮菩薩安樂

住處無量天龍夜叉阿脩羅迦樓羅緊那羅

摩睺羅伽人非人等所行大法味喜樂所持

一切衆生一切利益事為用一切煩惱災橫

所離非一切魔所行處勝一切莊嚴如來莊

嚴所依處大念慧行出離大奢摩他毗鉢舍

那乘大空無相無願解脫門入處無量功德

聚所莊嚴大蓮華王為依止大寶重閣如來

於此中住如此淨土清淨顯色相圓淨形貌

量處因果主助眷屬持業利益無怖畏住處

路乘門依止圓淨由前文句如此等圓淨皆

得顯現復次受用如此淨土清淨一向淨一

向樂一向無失一向自在

復次諸佛法界恒時應見有五業一救濟災

橫為業由唯現盲聾狂等疾惱災橫能滅除

故二救濟惡道為業從惡處引拔安立於善

處故三救濟行非方便為業諸外道等加行  
非方便降伏安立於佛正教故四救濟行身  
見為業為過度三界能顯導聖道方便故五  
救濟乘為業諸菩薩欲偏行別乘未定根性  
聲聞能安立彼為修行大乘故於如此五業

隱八

二十

應知諸佛如來共同此業此中說偈

因依事意及諸行 異故世間許業異

此五種異於佛無 是故世將同一業

若爾聲聞獨覺非所共得如此眾德相應諸  
佛法身諸佛以何意故說彼俱趣一乘與佛

乘同此中說偈

未定性聲聞 及諸餘菩薩 於大乘引攝

定性說一乘 法無我解脫 等故性不同

得二意涅槃 究竟說一乘

三世諸佛若共一法身云何世數於佛不同

此中說偈

於一界中無二故 同時因成不可量

次第成佛非理故 一時多佛此義成

云何應知諸佛法身非一向涅槃非非一向

涅槃此中說偈

由離一切障 應作未竟故 佛一向涅槃

不一向涅槃

云何受用身不成自性身由六種因故一由

色身及行身顯現故二由無量大集處差別

顯現故三隨彼欲樂見顯現自性不同故四

隱八

二十一

別異別異見自性變動顯現故五菩薩聲聞

天等種種大集相雜和合時相雜顯現故六

阿黎耶識及生起識見轉依非道理故是故

受用身無道理成自性身云何變化身不是

自性身由八種因故一諸菩薩從久遠來得

無退三摩提於兜率陀天道及人道中受生不應道理二諸菩薩從久遠來恒憶宿住命方書筭計數量印相工巧等論行欲塵及受用欲塵中菩薩無知不應道理三諸菩薩從久遠來已識別邪正法教往外道所事彼為師不應道理四諸菩薩從久遠來已通達三乘聖道正理為求道故修虛苦行不應道理五諸菩薩捨百拘胝閻浮提於一處得無上菩提及轉法輪不應道理六若離顯無上菩提方便但以化身於他方作佛事若爾則應於兜率陀天上成正覺七若不爾云何佛不於一切閻浮提中平等出現若不於他方出現無阿舍及道理可證此義八二如來於一世界俱現此不相違若許化身成多由四天下攝一世界如轉輪王於一世界或一主或

別主俱生不應道理諸佛亦爾此中說偈  
佛微細化身 多入胎平等 為顯具相覺  
於世間示現  
有六種因諸佛世尊於化身中不得永住一  
正事究竟故由已解脫成熟眾生故二若已  
得解脫求般涅槃為令彼捨般涅槃意欲求  
得常住佛身故三為除彼於佛所有輕慢心  
故為令彼通達甚深真如法及正說法故四  
為令眾生於佛身起渴仰心數見無厭足故  
五為令彼向自身起極精進由知正說者不  
可得故六為令彼速得至成熟位向自身不  
捨荷負極精進故此中說偈  
由正事究竟 為除樂涅槃 令捨輕慢佛  
發起渴仰心 令向身精進 及為速成熟  
諸佛於化身 許非一向住

爲度一切衆生由發願及修行尋求無上菩提一向般涅槃此事不應道理本願及修行相違無果故

復次受用身及變化身無常故云何諸佛以常住法爲身由應身及化身恒依止法身故由應身無捨離故由化身數起現故如恒受樂如恒施食二身常住應如此知若法身無始時無差別無數量爲得法身不應不作功用此中說偈

諸佛證得等無量 是因衆生若捨勤

證得恒時不成因 斷除正因不應理

阿毗達磨大乘藏經中名攝大乘此正說究竟

攝大乘論卷下

勝八

二十三

攝大乘論卷上

隱九

無 著 菩 薩 造

元魏 天竺沙門 佛陀扇多 譯

大乘阿毗曇經中對如來前為欲顯發大乘義故善住菩薩說所謂依大乘經明諸佛如來有十種勝妙勝語何等為十一者智依勝妙勝語二者智相勝妙勝語三者入智相勝妙勝語四者入彼因果勝妙勝語五者入彼修因果勝妙勝語六者還彼修行中差別增上戒勝妙勝語七者增上心勝妙勝語八者增上慧勝妙勝語九者滅除勝妙勝語十者智勝妙勝語如是此修多羅句顯發說大乘是佛語云何顯發如是此說中小乘經不說此十種句唯大乘中明所謂阿黎耶識智依事所說有三種性一是他性二是妄分別性

三者成就性以智相事故唯識說入智相事者謂六波羅蜜入彼因果事者謂十菩薩地還彼修彼差別事中受菩薩戒謂增上戒首楞嚴虛空等諸三昧增上心事說無分別智謂增上心事說不住涅槃滅彼果事有三種佛身一者真身二者報身三者應身彼果智事說如是此十種句非小乘教故唯大乘中顯勝說及勝上故是故如來依為諸菩薩說以是義故依大乘教故諸佛如來說有十種勝妙勝語應知云何復此十種相勝妙如來勝語明顯大乘是佛語及遮小乘是非大乘是以此十句小乘經所不說而大乘有說及此十句能令得大菩提善許不相違為得一切智智故是中說偈

彼依智相依 彼因及彼果 彼三界差別

彼果及除滅 智及上妙乘 至於勝進修

彼說餘處所無有 此見勝因上菩提

佛語說於大乘中 十句勝說於此經

有何義故此諸十句如是漸次說是以菩薩

從初學已先應諸法因果依已應於因緣善

隱九

巧成而有於諸緣生法中應相善巧成捨離

橫安誘遍善巧故菩薩如是善學故於彼善

取相中應令證學是故令諸障中心得解脫

於後入智相行已前修行中令修得六波羅

蜜已深淨身心故是以淨心所攝六波羅蜜

故於諸十地中分別修行三阿僧祇劫於後

令滿三種菩薩戒滿已令彼果涅槃及證阿

耨多羅三藐三菩提此是諸十句漸次說然

此說中一切大乘略盡是中初說智依勝妙

勝語如來經中說謂阿黎耶識以阿黎耶識

語故作阿黎耶識語說如來於大乘阿毗曇

經偈中說

無始以來性 一切法所依 有彼諸道差

及令得涅槃

還彼經所說

一切諸法家 彼識一切種 故說為家識

聰明者乘此

此是經證然復彼何故名阿黎耶識有生法

者依彼一切諸染法作果於彼彼亦依諸識

作因故說為阿黎耶識或復衆生依彼為我

隱九

故名阿黎耶識彼亦名阿陀那識此中有何

證如相續解脫經中說

阿陀那識最微深 喻如水波於諸子

我不為凡言說此 莫執取以之為我

彼以何義故名阿陀那識依一切色根故及

取一切依身事故如是彼依諸色等根不壞者乃至命不盡隨順故未來取身彼能生取身是故彼名阿陀那識彼亦名心如佛所說心意識爾是中意有二種依近作緣事故近滅識依與意識作生因第二意雜四種煩惱常共同身見我慢愛身及無明彼是依識所染生若以一身所生識第二是染境界識義故取近義故及不分別義故明二意是中有偈

雜染障無明	同法及諸五	三昧或勝事
說中應成患	無相而起我	生順行無窮
近順起我相	一切是不成	離染無心事
二是相違	彼無一切處	執成我等義
心順正義故	常順不相違	一切是同行
說無明不離		

心及身第三離阿黎耶識更餘處無以是義故釋成阿黎耶識是心事隨種子行彼意及意識以何義故說為心種種法種子習熏聚義故佛以何義故小乘經中彼心不說為阿黎耶識及阿陀那識攝甚微細智義故彼諸聲聞不修學行一切智人智故是故彼中間釋說智復說釋成解脫故不說諸菩薩者修行一切智人智故為彼說此識若不說者離彼識不得修行一切智人智然復異名小乘經說彼識如增一阿含中說喜樂阿黎耶世間及著阿黎耶阿黎耶所成并求阿黎耶滅阿黎耶故說法時親近正聽起隨順心許取法及次法如來出世間時世間說此希有法故如來出思益經中說以此義故小乘經亦異名說此阿黎耶識大僧祇增壹阿含經中

隱九

四

亦說彼為根本如樹依根住故彌沙塞僧中亦說言乃至世間陰不斷如是異名亦說彼識或有時節中色及心斷時非阿黎耶識有斷義彼是種子是故所有彼智所依阿陀那識事心事阿黎耶事根本識事乃至世間陰事說彼阿黎耶識此阿黎耶識轉明勝如王大道餘者復作是言心意識是一義唯文異然彼義不成意及識中義有見異故是放逸心亦應有異義成復有餘者言如來阿舍中所說喜樂阿黎耶世間如是等句者謂五陰是阿黎耶餘者復言同貪等樂受是阿黎耶識或復言身見是阿黎耶然彼於阿黎耶識迷癡故或從聞及解釋故作如是說依小乘經教分別安故然彼者此分別安事不成彼愚癡故如是分別已阿黎耶識轉勝成如是

差別說故云何轉勝明如是彼五陰於惡道釋九生處一向受苦時狀成彼既是一向狀故不成有狀樂事如是彼常求狀離同貪樂受者從四禪以上無復成狀離如是彼衆生中依止事不成身見亦同此法中信無我者狀離成是故此亦彼者依止不成然阿黎耶識至內身許事受一向苦道處生者及苦陰并求解脫者阿黎耶識中皆自身相彼解脫不應有從第四禪已上生者雖有同貪樂狀離阿黎耶識起我相愛等如是此諸同法信無我者雖有狀離身見而阿黎耶識作愛自身相如是分別阿黎耶識已轉勝明智是阿黎耶識傍名及異名分別安事然復此相分別事云何得知彼略有三種一自相差別處二因事差別相三果差別相是中阿黎耶識自相

義者依一切染等法習故彼有生因相種子  
攝取義故是中因事差別義者還彼染等諸  
法中彼阿黎耶識如是一切種子一切時作  
因事現成是中果差別者阿黎耶識中所有  
彼諸染法依無始已來習生事何者是習而  
以習名說此有何義依彼法同生滅故所有  
彼生相事此是說所謂如華薰胡麻同生滅  
胡麻故生彼香因事故生或多貪欲者有貪  
習貪等同生滅有彼心故彼因相似生或復  
多聞者有多聞習彼聞憶念已同生滅心中  
彼說因相事生故是以有此習義故說為法  
器亦名持法如是阿黎耶識中亦如是何者  
復彼阿黎耶識中染等諸法種子為當分別  
彼為不分別彼非如物分別彼處住非不分  
別然如是生彼阿黎耶識彼生勝力故說為

一切種子云何彼阿黎耶識及諸染法同時  
見遍互作因事所謂如燈燄及炷生燒因同  
時遍互作因及如葦束遍互人捉故同時不  
隨地中此亦如是遍互作因事應知亦如阿  
黎耶識諸染法作因諸染法與阿黎耶識如  
是因緣差別事不見有餘因緣云何無分別  
種種習而與有分別種種諸法因成所謂如  
種種色染衣已不見種種色若彼衣浸在器  
中爾時彼諸色種種差別現非一器中故如  
是阿黎耶識種種習熏時雖非種種能  
生果時向色器已無量種種相現諸法種種  
事此是大乘中甚微最細因緣有二種一者  
性差別二者愛不愛果差別是中所有依此  
阿黎耶識生諸法者此是性差別種種性分  
別現緣故是中迷初因緣者於阿黎耶識中

卷九

六

或言性因事或言本作因事或言自在應化  
 因事或言自身我相因事或言無因無緣事  
 第二因緣迷者復自身計為作者食者譬如  
 衆生盲人彼未曾見象為彼盲人將示象諸  
 生盲者或捉象鼻或牙或耳或足或尾或背  
 彼示已問象何相或說言如犁轆或言如杵  
 或言如鞞箕或言如碓曰或言如茗帚或言  
 如石山如是不通達不知此二種因緣故無  
 明障故如生盲或計為性或本因或自在或  
 自身或無因或作者或計為食者阿黎耶識  
 如象性相自體不知故略說阿黎耶識因事  
 及果事報識一切種子性已是故三界中攝  
 一切身及一切道是故說五偈  
 內外不分明 而說相順事 彼一切真實  
 說為六種子 空及同諸大 彼亦說隨順

隱九

七

定而忘諸緣 及自果將來 彼見而無記  
 或順彼無餘 熏彼非餘處 然彼是習相  
 六無有順義 三別相違故 諸念無同故  
 生餘隨順故 內外諸種子 彼說為生因  
 不續取盡故 自然壞遍故  
 所有餘六轉順識彼一切道處受果報應知  
 如中邊分別論說  
 一是作緣識 第二受果報 分別受報者  
 同發諸心爾  
 彼諸識迤互作緣故大乘阿毗曇修多羅有  
 偈  
 一切諸法依 如是彼諸識 迤互作果事  
 一切及因事  
 若此諸識迤互作因緣果者初因緣及彼第  
 二因緣有何緣謂增上緣然此六識有幾緣

所生增上念次第等緣生是此餘三種因緣  
世間者至愛不愛道及受果報者四緣成以  
分別明此阿黎耶識傍名及相復云何得知  
唯是阿黎耶識如是傍名說及如是相而非  
是六種轉順識爾如是中間差別安阿黎耶  
識已是故不成染淨事煩惱染事及業事生  
染事不成世間出世間淨事不成云何煩惱  
染事不成是以六識身中煩惱染習種子作  
事不成如是彼眼識貪煩惱使等同生滅彼  
是彼者熏有子及非與眼識滅已餘識中間  
以非習及不見習所依既無眼識前滅眼境  
中間同貪等生無故是故過去者不成如過  
業果報生然彼眼識貪等同生故習不成彼  
貪所依故及貪不堅非餘諸識別體故諸識  
同時生滅無故非自性餘性可有同生滅如

是故非眼識貪等煩惱及使熏成非彼識及  
識所熏如眼識如是餘六轉順識等如順釋  
應知所有非想以生滅已此處生煩惱染彼  
初生識彼亦無種子生同依止彼習過無故  
以生煩惱對治識彼餘一切世間識滅已中  
間阿黎耶識煩惱及使種子彼對治識中不  
成於諸煩惱性解脫故及同生滅無故後復  
更生世間識故久滅無已同依彼習應離種  
子生中間阿黎耶識是故中間阿黎耶識煩  
惱染事不成云何業染不成行緣識不順義  
故彼無取緣有亦不順故云何生染不成取  
後身身不順義故不入定地中滅已在中陰  
念雜染意識取後身然彼雜染意識中陰中  
滅已彼以歌囉囉故母腹中託若唯意識託  
者託已彼依力故母腹中應有依識行是以

二種意識從母胎應有同有故而非彼所託  
意識意識事成上以雜染身故及隨順意識  
念雖有彼意識託既依託意識彼為一切種  
子為當隨彼身依行者若隨彼所託彼是一  
切種子者是故唯阿黎耶識是傍名差別安  
成依識爾然若依彼故一切種子者彼以何  
依事作因識者彼非一切種子若所依作果  
事者彼一切種子此義不成是故此釋成所  
有彼託識彼非意識是報識彼一切種子故  
以取後身以認取餘色根何者報識而認不  
可見上意識及不堅牢因彼諸餘識取色  
根無非色可成是識及滅色迤互相依如鞞  
束修義故行彼亦不成中間報識食事義故  
不成諸大衆生非報識中間諸六識隨所三  
界中生諸大衆生作食所現從此滅已雖入

生定以雜染不入定意識取後身然彼不入  
定心彼地中雜中間報識以種子不成然生  
在無色界中中間一切種子報識雜染善根  
覺者無有種子無所可依得雜染善根心還  
彼處現出世間心諸餘世間心謝已彼行應  
得迴生非有想非無想生者現不用處出世  
間心時應得迴彼二道彼出世間識非有想  
非無想至所依非有用處行所依非涅槃道  
所依成欲捨身時或造善不善若上若下漸  
次依跡滅毒得清涼不應成中間有阿黎耶  
識是故生染中間一切種子報識中不成云  
何世間淨事不成如是離諸欲者未得色界  
心准得欲界善心於欲生猷離然是欲界中  
心後用行色界心不共生滅彼不熏此種  
子者不成非彼色界心過去無量生所攝彼

入定心作種子不成既無彼已釋成此所有  
彼入定色界心一切種子報識久時轉轉來  
後因緣故彼是善行習故彼心增上緣如是  
一切歇離地行中隨順如義應知如是世間  
淨事中間一切種子報識不成云何出世間  
淨事不成如佛所說外聞他聲音以內寂靜  
思量因彼事故得生正見以聞彼聲響意念  
故或熏耳識或熏意識或熏彼二是中彼諸  
法寂靜思惟憶念故耳識爾時不行意識亦  
餘識所隔雜故若寂靜思惟行生時彼久滅  
無常意識聞習所熏同習既無何處復彼種  
子心後時寂靜思惟行而生所有彼寂靜思  
惟修行世間心彼正見同順出世間心或時  
同生滅是故彼不熏以不熏故彼種子不成  
是故出世間淨中間一切種子報識不成是

應九

十一

中間習者彼種子攝不順故復云何一切種  
子與報識作染因成彼對治出世間心種子  
事不成出世間心是未曾有是故彼習本無  
既無彼習已有何種子生彼應說善淨法界  
盡唯以聞習種子生彼所有彼聞習彼為是  
阿黎耶識性為不若是阿黎耶識性者是中  
云何彼對治種子成若是非如是性者是以  
彼聞習種子有何依身可見諸佛得菩提已  
所有彼聞習隨心身現彼同事報識中行  
亦如乳水然非彼阿黎耶識彼對治種子故  
是中依微習故生中習依中習故上習生多  
以聞思修順義故然彼聞思修種子雖微中  
上然是法身種子應知阿黎耶識相違非阿  
黎耶識所攝出世間善淨法界因氣事故世  
間及出世間心作種子然彼未得出世間心

應九

十一

時現氣煩惱對治墮惡道對治銷滅作一切惡對治隨順親近諸佛菩薩世間亦諸新學者法身所攝應知諸菩薩解脫身所攝聲聞緣覺彼阿黎耶識法解脫身所攝隨所隨所微中上漸次增長如是如是報識亦微劣身

亦轉明一切時身亦轉明一切時轉身已彼報識一切種子離種子成及一切時滅已彼復云何阿黎耶識如乳水若爾非阿黎耶識同事而行一切時壞如鵝水中飲乳或入世間歇或入定習滅故入定習增長如轉身及入諸滅盡定雖不著識故彼中唯執不離成非滅盡定彼對治可取生非彼起已更復生報識已斷非餘處可取順成若復計言滅盡定有心彼亦是心善不善彼無記事故不生成彼亦不成若復言色心後生者諸法種子

事分別前未生亦不生色無色滅已及從滅十二盡定起彼不成及阿羅漢後心亦不成除唯次第緣事可成如是一切種子報識中間無染無淨成是故釋成彼無及隨所相說是中說偈

菩薩淨心 離諸五識 離餘轉事 以云何作對治迴轉 無量不成 因果分別 彼滅應順離子非事 若取轉事 彼事二無 轉事不成何者復此阿黎耶識差別事略有三種及四種應知是中三種者以三種習差別故一言說習差別二身見習差別三因緣習差別四三種習差別四種一取時差別二報差別三念事差別四相差別是中取時差別者所有諸習生彼無故行緣識及取緣有不成是中報差別者所有行有緣故諸道受報彼無故

無子後生諸法生事不成念事差別者所有  
彼意我相念事彼意無已身念取事不成是  
中相差別者所有彼同相不同相離受生種  
子相同受生種子相同所有器世間種子不  
同者所有內入種子所有同者彼離受生種  
子對治生不同者障滅及同者他十三所妄想分  
別取見淨諸行人一事中種種信如種見得  
是中偈

難滅證縛 說爲同事 行人亂心 自念外壞  
淨不相違 真實見淨 佛戒清淨 諸佛見淨  
所有不同彼同受生種子彼無故器世間衆  
生世間順勝事不成復麤澀相安相麤澀相  
者所有煩惱及使種子安相者有漏善法種  
子彼無故報作不作勝身中不成復受不受  
相受相者所有熟報善不善種子不受相者

所有言道習種子無量分別順種子故彼無  
者作不作善惡業得時不受用義不成新語  
言習生事不成復喻相幻燄夢患目等彼阿  
黎耶識彼時無故虛妄分別種子故相事不  
成彼復同相別相具有縛者同相世間離欲  
者壞相學者聲聞及諸菩薩一義一處除相  
阿羅漢辟支佛諸如來煩惱障具除相煩惱  
障智障及具除相如順彼無漸次煩惱滅事  
以何義故善不善諸法報中不定無記報如  
是無記善不善不相違善不善事迤互相違  
善不善事煩惱轉事不成是故唯不定無記  
是報識已說智依智相復云何知彼略有三  
種一他性相二妄想分別相三成就相是中  
何者他性相所有阿黎耶識種子中虛妄分  
別所攝識彼復何等身與受用識彼所受用

識受用識時識數識方處差別假意識自他  
分別善道惡道生滅識是中所有身與受用  
識及彼所用識及受識所有時數分別假識  
者彼語言習種子因生故所有自他分別識  
彼身見習種子因生故所有善道惡道生死  
者彼為因緣習種子因故此諸識一切塵一  
切道煩惱所攝說他性相者虛妄分別現見  
成此別現見成此諸識中所有虛妄分別所  
攝唯識事非有妄取義依見此是他性相是  
中何者妄分別相若非有塵唯彼識作塵現  
取故是中何者成就相若還彼他性相中彼  
塵相未無有事是中身與受用識等六內眼  
等塵知彼所受用識者六外塵色等應知彼  
能受用識者六種眼識等塵應知此諸識餘  
識差別應知復此諸識唯識無義故餘處有

隱九

十四

何見夢等見應知所謂夢中離塵唯識如是  
種種色聲香味觸屋宅林地風諸山塵現相  
事故見然彼處無塵義如是見者一切唯識  
隨義通達應知言等者幻餓鹿渴患目等應  
知然後如夢覺者一切亦如是識何以故如  
夢中唯識意生如是彼處亦不行行真實智  
覺已故行真實未覺者唯識事云何得知從  
阿舍及解釋順義中是中阿舍如佛十地經  
所說  
三界唯心作相續解脫經中彌勒菩薩問佛  
言世尊所有彼三昧境界中見像彼為於心  
異為不異佛言彌勒不異何以故彼念唯識  
所明識我說世尊若是彼三昧境界形像心  
中不異者云何以彼心而取彼心佛言彌勒  
無有法而能取法然彼心如是生以如是生

隱九

十五

故如是見譬如緣像故唯見像而言我見像以是義中間不離彼像中間像相似見如是生彼心如是中間而言見如是此阿舍將證成如是入定心時隨所情等知所有見像還見彼心離塵情等如是順釋已菩薩於一切識中如是測量取唯識中無彼情等憶念將識前已彼念所見聞思修亦隨所憶事識彼亦念過去故彼現相唯識得以此喻證故菩薩雖真智未覺已應思量唯覺事隨此如夢說種種諸識彼識順成唯識眼識等諸識眼等諸識復有諸色云何得知唯識事彼亦有阿舍及順釋如前說若是唯彼諸識者何故色事及現相事久住體行顛倒等煩惱染處因故餘時非塵為塵妄不成既無彼事煩惱障智障染事不成彼既無淨事不成是故如

是彼順義成是中有偈  
 妄念及妄想 說為諸色識 及無非色識  
 有彼非餘者  
 何故時等種種如說者行無時世間流不絕  
 故無量眾生界因故無量佛世界因故無量  
 所作事迤互假名分別因故無量攝取受用  
 差別因故無量愛不愛業果報受用差別因  
 故無量受生死差別因故云何復此諸識唯  
 識住事成略說有三種相一者但彼無義因  
 故二事同念見識因故種種事畫師所生因  
 故如是彼一切諸識無塵故唯如是同見相  
隱九  
 眼識等色等念故及彼識見乃至身識見唯  
十六  
 意識一切眼等法盡識同念意識識同見分  
 別故於意識及一切識生現相故是中有偈  
 唯彼二種事 行者入意識 唯入彼心已

彼力所成此

唯彼意識種種行故得彼名亦如身口等餘者行一切身中如畫師二種現相行唯彼塵現相故及分別現相故一切處觸現相故行色塵身依故彼意識彼餘色相身依故是中  
有偈

遠至獨行故 無身窟所依 能調不調心

我說爲淨行

如說此諸五根意識境界緣受成然是彼者意是依止爾復如說十二入經中六種意識是意入爾若有阿黎耶識識塵識分別安是中諸餘一切識彼念想識唯意識識同身彼見應知彼如是唯念想諸識彼見生因故如塵現相見彼生同依作事成如是此諸識唯識住事成云何有見塵而說無有義成如

應九

十七

佛所說菩薩成就四法一切諸識解通無義事相違識相知故亦如餓鬼畜生人及諸天等同事中見既別不念見覺識故亦如過去未來夢現相念故加意中間顛倒同順智故所謂有塵念彼念識不顛倒應得不加真智及隨順三種智知故如是諸菩薩及得禪定者得心自在憶持力故現如是事及得舍摩他諸行人觀法順故唯憶念現見故及得無分別智彼處住已現一切義如是此三種智隨順義故彼義本四諸相釋成無有義若是唯識義現見依者他性相云何他性以何義故說爲他性自習種子生故緣他性生已剎那後自不住有力故說他性彼是妄想分別非性非所依未曾有塵見故彼云何妄分別以何義故彼名爲妄分別無量相妄分別顛

倒相生故妄分別者無自相唯妄見故說爲  
妄想若是成就相者彼求無自性相彼云何  
成就以何義故說爲成就不以義故說爲成  
就緣淨念一切善根妙義因故亦是上義故  
名爲成就復有分別及無分別說分別性是  
中何者分別何等分別何等分別性意識分  
別以能分別然後自語言習種子及一切識  
語言習種子故是故無諸相分別故行一切  
處分別妄想分別故說爲分別復他性妄想  
念隨所有性他性妄想者是彼處妄想自性  
以何相以何義故先已釋云何復妄分別以  
何分別以何念以何念取以何慢以何假名  
以何安義名以念故他性中彼念取見彼慢  
分別起口業見等四種世間行故非有義而  
言有安故分別妄想此諸三性爲同行爲別

行爲別不別應說傍義故他性相他性傍義  
故彼亦是妄分別傍義故彼亦是成就有何  
傍名義是以他性他性習種子生他性因故  
有何傍名義以是彼如是妄分別及妄分別  
及諸分別因故有何義故隨彼如是妄分別  
如所分別如是彼求無義故有幾種他相略  
有二種一熏種子他相二染淨性不成他相  
如是此二種他相故說爲他相妄分別性亦  
有二種一者性分別二者勝分別故以爲分  
別成就性亦有二種一者性成就故二者淨  
成就故分別復四種一者性分別二勝分別  
三覺分別四不覺分別覺分別者解義事善  
巧故不覺分別者不解義事不善巧故復有  
五種一名所依義分別所謂此名有是義爾  
二義所依名性分別所謂此義有此名爾三

隱九

十八

名依名性分別者所謂不決定義名分別故  
四所依義性分別者未決定名義分別故彼  
二依彼分別所謂此義如是身如是各爾攝  
一切義故復有十種分別一根本分別所謂  
阿黎耶識二相分別所謂色等識三念現相  
分別所謂同依眼識等識四念異分別所謂  
老等樂受貪等他所惱時轉變等趣及欲界  
等異故五念現相異事分別所謂所說如是  
等異相彼異相他所將分別所謂不聞正法  
及聞正法者所有分別六不寂靜思惟所謂  
不聞正法者謂諸外道七寂靜思惟所謂聞  
正法同法者八妬分別所謂不正意思量身  
見等六十二見同順彼分別散分別謂諸菩  
薩有十種分別非事相散故事相散故正安  
散故毀謗散故一向事散故異事散故性散

故隨名義散故及隨義名散故此諸十句散  
事中對治故說無分別智一切諸般若波羅  
蜜中說如是彼障及對治具足般若波羅蜜  
應知若是傍名義他性相三種性成云何三  
種性無差別不成隨彼傍義他性者非彼妄  
分別非成就隨彼傍義妄分別者非彼他性  
非成就隨彼傍名成就者如是非彼他性非  
妄想云何復知如他性相妄分別性事現故  
非如是體性爾本名離慧故及自滅因故多  
名故多身相違因故不定名穢身相違因故  
是中有偈  
本名無慧故 多及不定故 成彼自多身  
穢身相違故 覺見諸法事 及見染淨等  
如幻應當知 及如虛空等  
復以何義故有如是所說事他性相一切事

不成彼無已成就性及無故如是一切事不成他性及成就性無故染淨無事患應見染淨是故非一切無是中有偈

他性既無成就一切 無事常時於諸染淨

所有此諸佛如來大乘方廣中說彼說中云

隱九

二十

何妄分別性應知無傍名義說可知他性相

云何知幻燄夢鏡像光明響水中月應化等

諸喻應知成就性云何知有四種淨法說中

知四種淨法者性淨故所謂真如空實際無

相真實義及法界是離垢淨所謂如是彼離

一切障垢彼得行淨所謂一切菩提分法及

波羅蜜等彼生因念淨所謂說大乘法如是

彼淨因故非妄想淨法界因氣故非他性如

是此諸四法攝成一切諸淨法於中有偈

幻等說故生 妄計無有說 於諸四淨中

說為真實淨

淨性離垢行念故彼淨諸攝四種義故復以

何相故他性相如所說幻等喻中明餘者於

他性相中迴妄顛倒取意故云何復餘者於

他性相中顛倒疑意成如是餘者作是意云

何無此義現境界成爲彼除疑迴義故說爲

如幻云何無義諸心心數順義成迴疑義說

如燄喻云何無此義而受愛不愛事迴彼疑

義故說如夢云何無此義而有淨不淨業愛

不愛果順不順事迴彼疑故說如鏡像云何

隱九

王

無義而有種種識順事迴彼疑義故說如光

云何無此義而有種種假名語言順事迴彼

疑義故說如響云何無此義實能取三昧境

界順事迴彼疑意義故說如水中月云何無

此義而諸菩薩故取意不顛倒作衆生益義

故受生迴彼疑意義故如應化事有何義故如梵王經中說我不見世間不證涅槃他相性中妄分別及成就性因故說世間及涅槃事無異事故如是彼他性妄想分別分故說為世間成就分故說為涅槃如佛阿毗曇中

說有二法是染分淨分彼二分有何義故說他性中妄想性是煩惱分成就性是淨分還彼他性彼二分以此義故說此義中何者說金藏土示現所謂如金藏土中有三事可見一地塵二土三金是中有地塵故見土及見有金若入火時不見土唯見金地塵者見土時非正見見金時非如實見是故地塵有二分如是此無分別智火觸彼識已彼識虛妄分別性事見成就性事故不見無分別智火觸彼識已彼識實成就性事故見妄分別性

事故不見是故所有妄分別識他性相二分成如金藏泥地塵爾如來或說一切法常或說一切法無常或說非常非無常以何意故說常他性相成就分別故說常妄分別故非常彼二分故非常彼二分故非無常以是意

故說如常無常不二如是苦樂不二淨不淨不二空不空不二有我無我不二定不定不二有性無性不二有生不生不二滅不滅不二求定不求定不二性滅不性滅不二世間涅槃不二如是等句差別諸佛一切密語以

歷九

三

此三種性句隨順應知如常等諸句中說於中有偈

如諸法所無 及如見非一 如是法非法  
不二義所說 彼一分事故 亦說名為事  
二分不名事 非事真實說 如見非如有

是故說為見 如是彼亦見 是故說為無

自體自無有 自事中不住 取者本亦無

故說為無性 無性義故成 上上依義故

無生亦不滅 永寂性滅故

然有四種意趣故及有四種密語漸次一切

佛語隨順解釋應知一者法同意趣故所謂

我是無量無邊時號曰毗婆尸正真正覺二

者時節意趣所謂若稱多寶如來名者即定

於阿耨多羅三藐三菩提如無量壽經說若

有衆生願取無量壽世界即生爾三者義中

間意趣如經所說供養若干如許恒沙等供

養親近已得解大乘義爾四者順衆生心意

趣所謂或有衆生讚行布施彼者復謗毀說

如是布施如是持戒及餘者說修事是以故

說四種意趣四種密語漸次一者勸發漸次

卷九

三三

所謂或聲聞乘或大乘中衆生法性勝故順

世諦理所說二者相漸次隨所法相說中示

現三性相三者對治漸次隨所說八萬四千

衆生行四者發願漸次隨所異義言音聲字

義餘說隨所有偈

非實而作實 顛倒中善住 煩惱善染故

得無上菩提

欲解釋大乘經者彼應以三種相差別故略

作解釋一者因緣說二者因緣所生諸法相

說三者以說聞義故說是中因緣集說者如

說言習所生法彼如是還彼報識順識中述

互緣故生彼復順識相諸法同念見識性然

彼憶持相分別相及法體相是以此示現三

種性相成如說同念見者彼知三相爾云何

復彼相解釋分別相者他性中無成就性中

有彼二有無有覺無覺有見無見真實同時  
彼他性中依非衆生分別衆生成就者行彼  
覺故彼不覺如說分別他性中成就彼處有  
不覺及覺故略說彼二邊所說義解釋所謂  
先已說句餘句示現彼分別或功德增上故

或義增上故功德增者所謂說佛功德善覺  
慧不二行無相法究竟佛行行故得一切佛  
法到無障道不退轉法無障境界不思住達  
三世遍一切世界身一切法無疑知一切成  
就慧無疑諸法知無分別知一切菩薩正受  
智不二佛行得最究竟不離如來解脫智盡  
至無邊中佛地通達法界最虛空界盡爾善  
覺佛者此句餘句所解釋應知如是善說法  
體成善覺慧者此善覺慧諸佛如來十九種  
諸佛功德攝成應知智中一向無障無分別

功德事非事二相真如最淨說三九自然佛所作  
不休息行功德法身中身心業無分別功德  
一切障對治功德降伏一切外道功德世間  
生世間法不能染功德法住功德受記功德  
一切世界中示現報身應身功德決疑功德

種種行入功德未來生法智功德隨信示現  
功德無量身化衆生行功德同法成波羅蜜  
功德異佛世界隨信示功德三種佛身說法  
不斷功德乃至世間際一切衆生助成一切  
樂及無量功德因此說故義增上者復如經  
所說菩薩成就三十二法故名爲菩薩助益  
樂深心故於一切衆生令人一切智智稱已  
智滅慢故淳厚深心故不作恩愛怨及非怨  
等心故未親故盡至涅槃美言悅目先應故  
不斷彼心故所計之事不休息不疲倦意故

聞義無厭足故自見過患故見他作過不說  
故一切威儀行菩薩心業故布施中不求報  
故一切有遺處不著修戒故不瞋一切衆生  
忍故聚集一切善根法以精進故離無色界  
禪故順方便智故四攝法所攝方便故破戒  
持戒不二心故勤劬聞妙法故樂住阿蘭若<sup>二五</sup>  
故不樂世間種種事故不希樂小乘故於大  
乘見大利益故遠離惡知識故親近善知識  
故淨四梵行故五神通遊戲故依智故住有  
行不住有行衆生不捨故一向定言故重實  
語故菩薩心爲首故如是等句初句中差別  
應知助樂深心故於一切衆生此助樂深心  
故有十六種作事差別應知是中十六種作  
事者轉轉行作不退作他所不勸而自行作  
不瞋作不望報作三句不望報故有益無益

不瞋喜乃至後生隨逐故彼相似口業故有  
二句苦樂中不二等作事不怯弱作事不退  
轉作事方便攝作事除障作事二句相續不  
斷念彼心作事勝至作事七句六波羅蜜正  
修行及攝取行正事成就行作正事六句親  
近知識聽聞正法樂蘭若捨惡覺心正念功  
德二句大乘功德二句成就作事三句無量  
清淨得益力得證功德彼令住作事四將衆  
生功德除疑教受財法攝取心故不雜心故  
如是等句與初句解釋差別應知如經說依  
於初句故句別有功德依於初句故句別義  
別爾如是智相釋已

攝大乘論卷上

音釋

首楞嚴

梵語也此云一切事  
畢竟堅固楞盧登切  
澀所立切  
不滑也

攝大乘論卷下

隱十

無 著 菩 薩 造

元魏 天竺 沙門 佛陀 扇 多 譯

入智相云何多聞熏身故非阿黎耶識所攝

如阿黎耶識種子成寂靜思惟所攝諸法義

現相所生可取事處有見者意言處是中誰

入智相大乘所熏多聞相續身無量諸親近

得故信欲一向故善集善根故善助功德智

行菩薩何處入還彼現見法義現相意語處

因大乘法生故信解地中見道行修造行及

盡至一切法唯識爾隨順聞信因故如是彼

分別證因故一切障對治及離障故從何處

入善根力持故三種相心轉明種種莊嚴滅

故念法義定慧一切時正行及不放逸故諸

世界無量眾生類無量念念中成阿耨多羅

三藐三菩提初轉心者隨所心布施等波羅

蜜助集行彼心我已得是故我不加用諸波

羅蜜修道能滿成第二轉明者諸禪法成就

已死後尋得隨所須一切身事得有障善根

者況我善修善根得無障善根尋即一切諸

勢不成第三轉明者是有偈

人類得菩提 於念念中間 眾生界無量

至時應捨行 隨心所行施 清淨無垢心

彼得心正事 勇健布施成 善者滅身已

自勢隨所心 善者滅身已 彼勢云何不

捨聲聞緣覺心滅念故於大乘中一切有疑

無疑故滅疑惑聞思諸法除我相我所相

執故滅法慢者前所住及安一切相不念不

分別故及滅分別者是中有偈

在前隨所除 相念自住處 智盡不分別

得上菩提爾

以何云何入彼聞習業寂靜思惟所攝法義  
現相現見意言四種求名義性勝安求等四  
種如實知故名事性勝安性勝如實知彼不  
覺見故如是彼菩薩唯入識故順修彼名義

隱十

二

現相意言彼名意言唯正觀彼名所依義唯  
意言正觀然彼名性勝安唯觀於後唯意言  
不覺已有名彼義有性勝安有性勝義相不  
見已此四種求及四種觀見知已彼名義現  
相意言中唯識入彼識事中入已為當唯入

彼有相見二事及種種事入名義性勝義六  
種相無義故彼可取能取事現處故不斷種  
種相義現相所生故闇中如見繩謂蛇現相  
故所謂如繩蛇不實非衆生故如是覺義者  
非有迴蛇意唯住繩意彼亦微思量色香味

觸相故是中依慧繩慧亦迴成如是此諸六

種相名現相意言中如繩慧六種相實義實  
處唯識慧亦思量成就性慧故如是此菩薩  
意言現相義相事入分別性入成唯主識入  
故他性云何成就性入迴唯識想彼者是諸

意言聞法習者彼爾時分別義相菩薩一切  
義現相生無有餘成是故唯識現相亦不生  
是故一切義無分別事名住已於法界如現  
見隨住爾時彼菩薩同等念已生無分別念  
智是故此菩薩名為入成就性於中有偈

隱十

三

法衆生法義 同別有性義 不淨淨盡至  
分別名境界

如是此菩薩智及相唯記入故名為入成彼  
入已名為住歡喜地善達法界及生如來家  
得一切衆生平等心得一切菩薩等心是彼

菩薩見道行佛以何義故入彼唯識處離法  
念彼出世間定慧智藉得種種相識智同相  
一切阿黎耶識因種子滅故法觸種子增長  
已轉身一切佛法集故入一切智智藉彼所  
得智一切阿黎耶識相處如幻等見故性不  
顛倒行是故彼菩薩如幻師所作義處相同  
因果雖有說一切時不顛倒成彼以識入中  
四種禪定所依四種橫相法云何知四種求  
故非不身無義無忍中得光明三昧煥相依  
增忍中光明增長三昧上依四種中如實觀  
知入唯識中以無義決定心真實中入一切  
三昧依順諦忍自此後唯識相思量彼是次  
第三昧依世間上法見故此諸三昧近入地  
應知如是入地得見諦道菩薩唯入識云何  
行修道隨所分別說十地攝一切修多羅現

事住故以雜念出世間及藉彼得定慧智故  
無量百千億習故如是身轉已為得三種佛  
身為得故修行所有諸聲聞證道法及此諸  
菩薩此二有何差別勝聲聞證入中菩薩證  
入有十一種勝事應知一者念勝念大乘法  
故二者淳至勝大功德助集淳至故三者證  
勝眾生法無我證故四者涅槃勝攝取不住  
涅槃故五者地勝十地盡至故六者淨勝煩  
惱習滅佛世界令清淨故七者一切眾生同  
得記心勝化眾生行不斷絕故八者生勝生  
如來家故九者取生勝佛世界會中一切時  
取生故十者果勝十力四無畏十八不共佛  
法無量功德成就故是中有偈  
遮互作客事 於事名所求 唯求彼諸事  
分別二所安 如實知見故 離義分別三

見彼是非事 彼無三所執 喻若順分別  
復有教授偈 鏡像意於後 菩薩在諸定  
迴彼義想已 憶持自想事 住心如是內  
知無所可取 於後無能取 無分別知爾  
更復有證道偈所謂大線莊嚴論中說

助集無邊行 功德智菩薩 法思善決定  
語言達義盡 彼知正義已 說住彼定心  
法界現意故 是以離二相 離心無有餘  
善知心亦無 知二既是無 正住於法界  
不分知力故 同時常同行 彼身窟聚患

如象滅諸毒 牟尼說善法 善住意思量  
根本法界處 念至智意故 唯分別正取  
速得功德處

如是說入智相已彼因果說云何知六種波  
羅蜜故謂布施持戒忍辱精進禪定智慧故

云何此諸六波羅蜜唯識入成隱十云何彼入果五  
六波羅蜜成是中菩薩於施不著於戒不毀  
於苦不瞋於修不懈息如是此諸亂因不行  
故因不行故一向已寂靜思惟諸法入唯識  
已依六波羅蜜及入唯識故菩薩淨深心所

攝故得六波羅蜜是以中間六波羅蜜行順  
說信故樂求隨喜故得利潤離忍菩薩自大  
乘中說甚深大唯分別正覺得無分別智  
欲信淨心明 本彼覺法流 十地近菩提  
不假自然得

有何義故唯說六波羅蜜障對治差別安故  
一切佛法集句處故及隨順化一切衆生故  
不動相對治故說檀波羅蜜及尸羅波羅蜜  
不動相謂世不著及寂不著動者迴相對治  
故說謂羸提波羅蜜及毗離耶波羅蜜迴因

相者世間衆生作惡行長受苦及於修善行法中生疲倦以發不迴失相對治故謂闍那波羅蜜及般若波羅蜜失相者亂心及無智如是障對治數差別故四波羅蜜不散相一波羅蜜不散相成以散依故如實法正覺集諸佛法如是集一切佛法句處故數差別以檀波羅蜜益衆生尸羅波羅蜜不作惡能忍毗離耶波羅蜜作事盡至故如是益相化衆生化以故調伏於後不入定心爲令入定心已入定心爲得解脫故數勸故得解脫如是化一切衆生句處故數差別應知然此諸波羅蜜相云何知以六波羅蜜身最依菩薩心故彼以最故遍行不斷增上意一切衆生助樂故方便善巧最故所有無分別知攝取故發願最者阿耨多羅三藐三菩提作願故淨

隱十

六

最煩惱智障修集無障故所有布施彼亦名波羅蜜所言波羅蜜布施非波羅蜜如是四句如布施中如是諸餘波羅蜜中皆有四句如順應知此諸波羅蜜以此何義故有此漸次說前波羅蜜後波羅蜜隨順生故彼復釋云何知一切世間聲聞緣覺布施等善根中增上到彼岸故波羅蜜者妬恚貧窮破除故令得大勢功德故布施持戒滅惡道令得善道三昧戒瞋恨滅除故他者仿佯住忍懈怠及諸惡不善法令遠離故增長無量善法出故精進破亂想內心住將來故禪定一切見無智滅除真故及想別故知諸法故名智云何此諸波羅蜜有修事知略有五種修事應知習行同行修事信欲修事心正念修事方便善巧修事所作事憶持修事是中四種事

如前所作憶持事修事者所有諸佛自然作佛事不斷不休息修諸波羅蜜令滿滿已心念修喜樂隨喜憶念等心六種心所攝故修廣心不斷心喜心作益心大心及真心所有菩薩隨所阿僧祇劫得阿耨多羅三藐三菩提如是等時念中捨一切自身及恒河沙等世界七寶令滿已施諸佛如來乃至未坐道場而菩薩行布施心無厭足如是等時念中三千大千世界滿中少時現四種威儀雖少一切資用而現作持戒忍辱精進禪定智慧心乃至坐道場如是菩薩不厭修持戒忍辱精進禪定智慧等心此是菩薩廣心所有彼菩薩此無厭足心乃至坐道場不斷及不捨是名此身若彼菩薩喜心故彼六波羅蜜所作衆生益非彼衆生已得此益故此是

菩薩喜心若彼菩薩作益衆生於六波羅蜜作益攝取見如已身自身見如衆生此是菩薩作益心若彼菩薩彼如是六波羅蜜所集善根迴發願令一切衆生得受果報此是菩薩大心若彼菩薩彼如是六波羅蜜修集善根與一切衆生同發願向阿耨多羅三藐三菩提此是菩薩真心如是六種心所攝故修樂喜心若彼菩薩六種修心行行者彼餘無量諸菩薩彼善根令隨喜如是菩薩六心所攝隨喜心令修若彼菩薩一切衆生六種心所攝六波羅蜜修事希求如記六心所攝六波羅蜜修不離者乃至坐道場如是菩薩六種心所攝希求意行修若此六種心所攝菩薩心修故聞已發一好心彼功德量等功德及一切惡作障消滅何況菩薩云何此諸波

羅蜜有差別以三種相應知法施財施及無畏施止戒攝善法戒作衆生益戒作惡忍羸提忍苦羸提法思惟忍苦羸提勇猛精進行精進不怯弱不瞋恨喜精進行現相作憶持無分別方便行無分別及有分別及藉彼得智云何此諸波羅蜜攝事應知此諸波羅蜜攝一切善根彼相彼隨順及彼因氣故云何此諸波羅蜜諸障一切煩惱攝事知彼相彼因及彼果云何此諸波羅蜜有益事可知世間行時勢力所攝同生所攝眷屬所攝大作事行成吉所攝不惱少塵所攝一切工巧諸論呪術處細意所攝增長是無惡乃至坐道場一衆生現一切義作事是名菩薩益云何此諸波羅蜜通共決定分別事知或有處一切六波羅蜜布施聲說或有持戒聲或有忍

辱聲或有精進聲或有禪定聲或有智慧聲說是中有何意趣一切波羅蜜行中彼一切同助至故是意如是說入因相果已云何彼修差別事知謂十菩薩地何等歡喜離垢明作醜難勝現前遠行不動善慧及法雲云何此諸地十事差別應知十種無明障對治故如是十種相智中及法界十種障住故云何十種相智法界一切處義故初地中上義故第二地中因上義故第三地中無所取義故第四地中身心無差別義故第五地中無煩惱淨義故第六地中種種法無差別義故第七地中無勝無劣義故第八地中相自在身義故及世界自在依義故第九地中依智自在義故第十地中依業自在義故依陀羅尼三昧門自在義故是中有偈

上義及因上義故 不攝義及身相續

無煩惱染淨義故

乃至不異義 不勝無劣義 依第四自在

法界中無明 二種及以十 十地有障故

對治說諸地

然此無明諸聲聞不雜諸菩薩中雜何故初地名為歡喜彼初故自益他益堪能成德義故何故第二地名為離垢破戒垢令遠作故何故第三地名為明作不動三昧三摩拔提依故大法光依故第四地名為燄菩提分法燒一切障故何故第五地名為難勝合真俗智行難勝故何故第六地名為現前因緣智依般若波羅蜜行現作故何故第七地名為遠行有功用行盡至故何故第八地名為不動一切相不動故何故第九地名為善

慧得上辯才智故何故第十地名為法雲雜

念一切法智一切陀羅尼三昧門藏故如雲

如虛空上煩惱障滅故法身滿故云何此諸

地得智有四種相得信地信故行得順地中

二地十一種法行得故證得初地中證法界

證一切地故成就得此諸地修盡至故云何

此諸地修事知此菩薩地地中修舍摩他毗

婆舍那已有五種相修何等五種所謂雜修

無相修無功用修轉明修轉轉修如是此菩

薩此五種修已得五種果所謂除一切惡身

種種想離得樂法意一切處無量不作畔在

相法光明現相知淨分別相彼諸分別念同

行為滿法身及成就故上中上因作攝故名

以十地中十波羅蜜修事成六中六隨所說

有四方便波羅蜜所集善根彼一切眾生共

故發願向阿耨多羅三藐三菩提作願故願  
波羅蜜者未來種種願現相故波羅蜜緣牽  
將故力波羅蜜者能修力等六波羅蜜不斷  
同行故智波羅蜜者六波羅蜜差別智法同  
受報化衆生故然此四波羅蜜般若波羅蜜  
無分別智藉得智所攝然復一切諸地一切  
波羅蜜非不修成波羅蜜藏所攝此法門幾  
時此諸地修事滿成有五種衆生三阿僧祇  
劫信行人初阿僧祇淨深心行無相行及有  
相行有六地及七地第二阿僧祇逮彼不現  
相人自此以上乃至十地第三阿僧祇修道  
滿足成是中有偈  
勝上力故 堅心勝智 菩薩三祇 發行盡至  
如是說因果修差別已是中云何增上戒勝  
事知如菩薩地持中說受菩薩戒品中略復

有四種勝故勝事應知差別勝同不同戒勝  
上勝及甚深勝是中差別勝者謂受戒攝善  
法戒作衆生益戒故是中止戒者二種戒住  
義故知攝善法戒集佛法住義故作衆生益  
戒者教化衆生住義故知聲聞同戒諸菩薩  
性重不同行不同戒者制重同行故彼戒中  
隨所聲聞犯於中菩薩不犯戒隨所菩薩犯  
戒是中聲聞不犯戒菩薩防身口心戒聲聞  
唯防身口是故菩薩起心犯戒非諸聲聞略  
說所有一切衆生惡而有益身口意業彼一  
切菩薩應行及彼中學如是共不共勝應知  
上勝復有四種上故種種無量戒上故攝取  
無量功德上故一切衆生助益樂心眷屬上  
故阿耨多羅三藐三菩提住上故及得無量  
功德疾得阿耨多羅三藐三菩提是中甚深

若菩薩如是方便善巧故殺生等十種業修行是以不惡成得無量功德速得阿耨多羅三藐三菩提或應化身業口業是甚深戒應知是以作國王治國計種種示衆生惱事是以化衆生安置善處示種種生惱衆生示餘益餘者令心以發發已先化化已心迴此是菩薩戒甚深勝事如是四種勝事略說菩薩止戒勝事應知如是分別復有菩薩戒差別無量亦如毗尼嚮方廣修多羅中如是說增上戒勝已增上心勝事復云何知略有六種差別應知念差別種種差別業作事差別現氣差別業差別念大乘法故大乘光明一切功德積聚三昧三昧王現護首楞嚴等三昧無量種種故一切法雜念智顯順故阿梨耶識一切障諸惡使令除故禪定樂行已隨

所生處生故一切世界無障神通現故動放光遍視異事作來往略廣一切色身入同行往上下作自在隱蔽他神通現念與樂放光現大神通故攝一切苦行現十種苦行故十種苦者所謂受許苦行菩提願許故不退苦行世間諸苦不退故不背向苦行一切衆生惡行苦行中彼現現事故現苦行作惡衆生中作一切利益義現故不染苦行世間生以世間法不染故信苦行於大乘雖無解一切甚大事信故證苦行衆生法無我證故順覺知苦行諸如來甚深密語所說順覺知故不寂靜不染苦行不捨世間彼不染故行苦行住一切障解脫諸佛如來乃至世間衆生際自然作一切衆生一切義行故可者復順覺知苦行所有諸佛密語說若隨彼所覺所謂

隨十

十二

云何菩薩布施成若使無所布施而彼無量  
十方世界作布施成云何布施喜心成若一  
切布施不喜樂云何布施信成若使諸如來  
信不去云何布施與意成若使自身令與布  
施云何樂布施成若使一切時無所布施云

隱十

十三

何布施大事成若於布施起不堅相云何有  
施增長成若使起妬心云何布施盡意成若  
使不住於盡法時云何布施自在成云何布  
施無量成若不住無盡故如布施如是持戒  
等乃至般若波羅蜜隨順應知云何殺生成  
若使衆生世間害云何偷盜成若使餘者未  
與衆生而自取之云何邪淫成若使邪淫而  
行云何妄語成若使如妄語作妄語說云何  
綺語成若使常以空門行而行云何惡口成  
若使到智彼岸云何兩舌成若使善知諸法

而能詮說云何貪成若使常與無常禪定法  
令得故修行云何瞋心成若使一切煩惱心  
中取行云何邪見成若使一切處到一切事  
如實邪見經明甚深佛法何等法而說甚深  
是中有此說常法佛法依法身常故斷見法  
佛法滅一切障故生法佛法者能生應身故  
有覺法佛法者八萬四千衆生行有對治故  
有貪法佛法者有貪衆生取如已故如有  
瞋法佛法有癡法佛法見有凡夫法佛法無  
染法佛法真如成就已一切障不能染故離  
染法佛法者生世間而世間法不能染故以  
是義故名爲甚深佛法修諸波羅蜜化衆生  
令佛國清淨現一切佛法故諸菩薩三昧作  
事差別應知如是說增上勝心已增上勝慧  
復云何知無分別智中性處身處因處念處

相處持處伴處報處因氣處出處盡至處藉  
 彼無分別功用行等處差別處藉無分別得  
 處餘處持自然作事處甚深處意無分別智  
 增上慧勝知是中離五種相無分別性智故  
 意離念故果離有覺有觀地故離想受滅定  
 捨離色性故真實處捨種種相故彼無分別  
 智離如是五種相應知此如所說無分別智  
 性差別安中說偈  
 諸菩薩真實 遠離五種相 無分別智處  
 真中種種名 諸菩薩身者 善心正是心  
 無分別智中 義心真實說 諸菩薩因者  
 同言聞習故 無分別智中 意行同思惟  
 諸菩薩念者 諸法無證事 無分別智中  
 無我及真如 諸菩薩相者 於彼正念處  
 無分別智中 智處無諸相 隨順真實義

隱十

十四

分別無有異 迥共隨順故 彼義順和成  
 離智無言說 說中有所行 以說相違故  
 彼說無有言 諸菩薩持者 彼智無分別  
 藉彼得彼行 彼到增長處 諸菩薩伴者  
 說為二種行 無分別智中 五波羅蜜性  
 諸菩薩報者 諸佛二界中 無分別智處  
 以得順行故 諸菩薩因者 上上諸生處  
 無分別智中 勝到故正說 諸菩薩出事  
 為得順義故 無分別智中 解知諸十地  
 諸菩薩盡至 因三淨身得 無分別智中  
 得上神通故 如空無有染 彼智無分別  
 眾惡種種上 唯信欲為正 如空無所染  
 彼智無分別 遠離一切障 得順成就故  
 如空無有染 彼智無分別 常行世間故  
 而世法不染 癡義隨順故 如癡所覺義

隱十

十五

非如不瘥用	說為三種智	如癡所用受
如癡所覺知	非如癡所用	說為三種智
解通五種義	如達五種事	如意識所知
說為三種智	不通論修論	如通法義解
如是漸次知	知為行創首	如人蔽諸目
彼智無分別	彼後得開目	彼智藉所得
如空智亦爾	彼智無分別	彼處色現相
彼智藉所得	如珠伎樂等	作事無分別
如是離住故	諸佛業莊嚴	非彼及餘處
有智及無智	彼智無差別	是智無分別
體性無分別	明識一切法	衆生中分別
彼智無分別		
是中無分別	功用行有三種	因現相取生差
別故無分別	智亦有三種	少欲知足不顛倒
無分別無謗	故藉彼得智	亦有五種證得憶

念差別離成就時現分別故釋成無分別智  
 義故復說餘偈  
 餓鬼畜生人 諸天如羅漢 等同意差別  
 得成諸塵義 過去如夢等 無差亦無二  
 非有而作念 彼念順義故 義及成就義  
 彼智無分別 彼無即無佛 得事即不成  
 菩薩得神通 彼以信力故 地等如是無  
 隨善者覺見 成就此智慧 勇健得禪定  
 一切法正依 及見如是義 智行分別中  
 及現一切義 應知無義事 彼記永所無

隱十  
 般若波羅蜜中無分別智及無優劣如大品  
 經說菩薩住般若波羅蜜中以不住故能滿  
 修行彼云何以不住故能滿諸波羅蜜捨無  
 種處故捨離外道我見處見故捨離未得正  
 諸菩薩妄念分別處故捨離世間涅槃二邊

十六

處故捨離唯滅煩惱障處喜故捨離眾生益  
捨離無餘涅槃界處聲聞乘及菩薩乘中有  
何勝差別有五種相勝故無分別勝故唯陰  
等法無分別故非有方勝證正一切相知及  
依一切眾生方故不住勝因不住涅槃故永  
勝無餘涅槃界中住到無量故及上勝果此  
經無乘有上勝故是中有偈  
五種勝義故 慈悲以為身 世間出世勢  
不久當得現

若諸菩薩成就如是增上戒增上心增上慧  
功德得自在於眾生益處何故復有諸眾生  
而復有苦縛者示彼眾生有彼眾生業障對  
故諸善法受彼助得勢示現於彼生善起障  
故示現開現故示現還受彼受用勢時現彼  
不善法益因事故助受彼勢時還彼餘眾多

隱十

十七之二

眾生示現有障因故而見眾生眾生眾事有  
縛是中說偈  
現煩惱障故 患目不正視 諸眾生菩薩  
不得諸勢義

如是說增上慧勝事已滅勝事復云何菩薩

滅者謂不著不住涅槃彼相者捨同諸煩惱  
染不捨世間偈中轉身是中世間是他相性  
是煩惱染分涅槃彼亦是淨分身者彼是二  
分他相性者轉身還彼他相性中得對治所  
染分中轉淨分中護然彼迴略有六種作微

隱十

十七之三

弱益迴以信力故住聞習故依有慚愧煩惱  
行不行故得證迴入地諸菩薩現正不正現  
處故乃至六地修轉不現有障念相現善淨  
正意故乃至十地中滿果迴現無障一切相  
念得一切相念自在微小迴小乘已證眾生

無我故一向背世間故一向捨世間上迴諸  
 菩薩已證法無我故還彼處見寂靜滅諸煩  
 惱使等而不捨彼故諸菩薩於微小迴中有  
 何患捨衆生益果菩薩法離已共諸小乘等  
 同解脫是患菩薩上迴中有何利益世間法  
 中自身及他身得自在故一切道一切衆生  
 視已身故多以三乘中種種善巧方便化衆  
 生令住故是中說偈  
 正覆迷凡夫 不正一切現 諸菩薩常正  
 不假自然行 不說而說知 非義正義故  
 彼身有轉事 正說爲解脫 世間及涅槃  
 若生現智者 爾時彼世間 即說爲涅槃  
 不捨非不捨 善知世間故 無利無有衰  
 善知涅槃故  
 如是說滅勝已智勝云何知以三種佛身故

說智勝事一真身二報身三應身是中諸佛  
隱十  
 真身謂法身依一切法得自在故報身若以  
 種種諸佛衆會中顯明法身所依佛世界清  
 淨依受大乘法樂故所有依法身者從兜率  
 天中託身生受欲出家親近外道苦行成道  
 轉法輪示大涅槃是中說偈  
 得相自在事 以攝受身故 分別甚深德  
 諸佛作念事  
 諸佛如來法身有何相略有五種應知一轉  
 身相一切煩惱障分他相性迴轉中一切障  
 得解脫現法自在處淨分依轉迴他相性故  
 自法體相能滿十波羅蜜得十自在故是中  
 命自在心自在及資用自在者爲滿檀波羅  
 蜜故業自在及生自在者爲滿尸羅波羅蜜  
 故信自在者爲滿羼提波羅蜜故願自在者

為滿毗離耶波羅蜜故五通所攝如意通者  
為滿禪波羅蜜故智自在及法自在者為滿  
般若波羅蜜故不二相事非事二相故依一  
切法非事故有為無為不二相業煩惱無為  
有現相時現得自在故別不別是一不二相  
是中一切諸佛不異身故無量身故示現成

佛於中說偈

自稱無我故 離別無有身 是彼本順故

分別得立色 性差別無異 具足及無始

不分別一佛 或多依久處

常相依真如淨相本願力取作事不盡故不  
思議相彼真如淨中唯內所證知世間餘未  
曾有及非測量境界云何復此法身見覺觸  
故彼初得暫念大乘無分別藉彼得智五種  
相善修故一切諸地中善集助道行微小難

壞障能令壞故如金剛三昧彼三昧中間壞  
一切障故依彼身轉故得復有幾種自在故  
法身得名為自在略說五種世界身相好無  
分別無邊聲響音不可觀頂自在故轉色陰  
上妙無量最樂行自在轉迴受陰故說一切  
名身句身自在身轉迴想陰故應身願顯引  
衆生攝取白法自在事轉迴行陰故如鏡觀  
見作事憶持知自事轉迴識陰故有幾處意  
身法身應知略說三種身種種佛身行依故  
是中說偈

得五種愛身 諸佛得自己 利愛彼所得

是彼義求得 所作無能障 法微義通得

得無非最愛 佛常不盡見

受種種報依身化諸菩薩故種種應身依故  
多以化聲聞法身有幾種佛法所攝應知一

者淨轉阿黎耶識得法身故報者轉色根得報智故行者轉行欲得無量智行故自在者轉種種業所攝自在得一切世界無障礙神通智自在故假用者一切見聞解知轉假名得悅一切衆生智說自在故去遣者轉一切

諸難還遣得一切衆生一切難去遣智故如是六種佛法故諸佛法身所攝應知所有此諸佛法身彼為雜為不雜身心業差別故不雜視無量處成正覺故雜如法身報身亦爾心業差別故不雜非身差別以轉無量身故應身者亦如報身應知法身具幾種功德應知善淨四種無量解脫及諸有退適淨處無諍願智四無礙六通三十二相八十種好四種一切相淨十力四無所畏三護四念處滅習不忘法大悲十八不共法及一切相具智

隱十

三十二

故是中說偈

慈念諸衆生

歸命彼益事

知所知遍處

滅一切煩惱

自然無有障

歸命能釋者

心常無有退

來往知他心

讚取丈夫法

歸命分別者

三昧智自在

令利諸衆生

智滅及出事

皈命不可退

順利及諸心

得離一切障

歸命心解脫

不雜滅煩惱

不退常入定

身及所依處

歸命善說者

衆生無實中

一切生見聖

取處及諸勢

歸命得彼岸

大乘出世利

作障并演說

諸衆善能說

不利世樂心

牟尼退世間

無餘一切衆

歸命有高處

一切諸難中

言智及說者

往知彼語言

歸命善教誨

見已即生敬

應身并願中

方便皈依淨

皈命魔降伏

自他及外道

遠離二種染

隱十

三十二

無護不可忘	皈命將諸眾	修行一切行
無有聖不知	一切時悉知	歸命真實義
眾生所作中	聖視不相違	作事無暫停
歸命不忘者	一日一夜中	六時觀眾生
成就大慈悲	歸命一心者	行至及與得
智慧并諸業	諸聲聞緣覺	歸命最上者
三身大菩提	具得一切相	遍處一切眾
歸命決疑者		

諸佛法身成就如是諸功德復有餘性因果業順行功德是故諸佛如來法身名為無上功德應知是中說偈

成就諸真實 超過一切地 到一切眾生  
 度脫一切眾 具無量無邊 世間見功德  
 世界不可見 一切諸人天

然復甚深最甚深諸佛法身彼甚深事云何

知是中說偈	無生生諸佛	不住而善住	一切自然事
食為四種食	不破及無量	無量同一業	
不見及見業	諸佛三身成	無有成正覺	
非一切非佛	念念不可量	事非事所顯	
不染及至染	并染有所依	非染知染已	
入真正所體	諸佛過諸陰	住於正陰中	
彼非餘非即	彼捨中善滅	一切是雜業	
唯離大海水	作事竟復作	益他無有念	
不見眾生成	如彼器中月	遍一切世間	
彼法光如日	或時成正覺	或涅槃火滅	
無時而彼無	諸佛常住身	諸佛非正法	
諸人趣惡道	非梵行法中	真實身處身	
彼一切處行	及以無處行	見一切身中	
一切根無境	除滅諸煩惱	如呪禁毒藥	

隱十  
 二十二之一  
 二十二之二

煩惱到惱盡 諸佛一切智 煩惱到道處  
世間寂滅處 是故大方便 諸佛不思議  
然此甚深有十二種應知所謂生成業住甚  
深差別算數業甚深成正覺甚深猷離甚深  
滅陰甚深教化甚深時現甚深成正覺示現  
涅槃甚深行甚深示現已身甚深滅煩惱甚  
深不思議甚深義法身諸菩薩憶念諸佛時  
有何等念所念略說菩薩以七種相隨念諸  
佛一切諸佛是得時法自在故修念諸佛得  
一切世界無障礙神通是中說偈  
障中開少因 眾生界中滿 諸佛無自在  
定二隨順者  
諸如來常身者真如無間垢解脫故諸佛如  
來最微惡者遠離一切煩惱智障故諸佛自  
然者自然作一切佛事無休息故諸佛大勢

卷十

二十三

者佛世界清淨受大勢樂故諸佛無染者世  
間生而一切世間法不能染故諸佛如來大  
義者示現成正覺及涅槃未化衆生令化已  
化者為得解脫故是中說偈  
唯在於已心 常勢淨所顯 不為而大法  
報身故所得 不急而能行 現彼復多生  
一切一切佛 智者彼應憶  
諸佛世界清淨事復云何如佛十萬偈修多  
羅菩薩藏序分中說如來最光明七寶莊嚴  
遍無量世界放大光明無量善分別住處中  
間住故不可差別界過三界境界過出世間  
上善根所生善淨自在識相處如來加持處  
大菩薩住處無量天龍夜叉乾闥婆阿脩羅  
迦樓羅緊那羅摩睺羅伽人非人行處大法  
味愛樂所潤處現一切衆生作一切事處離

一切煩惱所惱處離一切魔處過一切莊嚴  
如來莊嚴加持處過大念意至處大奢摩他  
毗婆舍那乘處入大空無相無願處無量功  
德莊嚴大蓮華王處大妙堂中住處爾是此  
佛世界清淨中明色世狀勢量施處施因施  
果勢諸勢伴勢眷屬勢益勢業作勢潤勢無  
畏勢住處勢行勢乘勢持勢門勢及說家勢  
然彼佛世界清淨中色勢一向清淨一向樂  
一向不惡一向自在然復彼諸佛法界一切  
時作五種作事應知防護衆生諸難事見者  
離瞽盲瘖瘂顛狂等諸難作事故救濟防護  
諸惡道作事於不善處勸令安住善處故無  
方便防難作事諸外道無方便行解脫處毀  
令住佛法故親同見防難作事過三界助道  
行故乘防難作事諸菩薩住異乘及不定諸

聲聞令修行住大乘故此諸五種作事中一  
切諸佛等作事應知是中說偈

因身作事差別故 及說諸行差別事  
彼差力故諸世間 非彼無故諸如來

若是不共聲聞緣覺同諸佛法身成就如是

功德勢者彼以何意故說為一乘是中說偈

別取有餘者 及持有餘故 為不定者說

諸佛一乘理 信於法無我 等有性差別

深心應化故 盡處唯一乘

以何義故一切諸佛如來等同法身而說多

佛事故於中說偈

一界無有二 常同有作事 次行不順故

釋成多佛事

法身諸佛云何不永涅槃非不永涅槃應知

是中說偈

遠離一切障 及作事不盡 諸佛未已滅  
亦是不名滅

何故報身不各具真身成有六種相故示現  
色身故及無量佛世界中分別現故隨信現  
故不定見真實異種種見故現同生事菩薩

卷十

二十五

聲聞天等種種眾雜見故及阿黎耶識等轉  
身現故唯成報身不名真身有何義故唯是  
應身不名真身有八相故諸菩薩遠時得不  
動三昧兜率天中人中生事不成宿命知者  
書數算印工巧論受欲行餘事中無知不成  
不善說及善說法中知己往親近外道處不  
成善知三乘行故苦行不成捨百億閻浮提  
一閻浮提中成正覺轉法輪不成中間成正  
覺示方便餘處應化身作佛事彼唯兜率天  
中成正覺何故不一切閻浮提中同時成正

覺事知此知中無阿舍證復無餘義可解釋  
成復無二佛同時一世界中現有相違故彼  
多化故攝取四方世間及如無二轉輪聖王  
同時生故是中說偈

諸佛未應化 同至多藏故 一切相成覺

見故而能行

一切眾生利益事萬行修集大菩提未入涅槃  
不成願行徒修無報故報身應身無常故  
云何諸佛常身依常法身故於諸因身應身  
報不定故復應身者示現功德如常受樂及  
如常勢故常事應知諸佛法身雖無量無邊  
時諸佛義處無有假用作事於中說偈  
諸佛德勝無異無量 眾生因弱彼不失者  
得已得彼一切無因 有斷彼此不應順成  
攝大乘論卷下

